

مروة زهران

بِأَجْرٍ



عصير الكتب للنشر الإلكتروني



مروة زهران

بِـ رَاح

جميع الحقوق محفوظة © عصير الكتب للنشر الإلكتروني

<http://book-juice.com>

بـ راح

المؤلفة : مروة زهران

نشر في : أغسطس ٢٠١٤



مَا قَبْلَ الْبَصَايَةِ

توضيحات هامة

- الأفكار والمشاعر السلبية (خوف، وجع، يأس،) في حد ذاتها، مش عيب ولا حرام إننا نعبر عنها ونبوح بيها ... بس المشكلة إن مابقاش ليها تعريف معين ثابت أو أسباب معروفة واضحة يساعدونا في إننا نتحرر من سيطرتها علينا أغلب الأوقات .. وده بيخلينا نتوه .. كل واحد بيتوه في متاهته .. مش بيبقى فاهم ليه خايف /ليه مخنوق/ليه مكتتب .. ولا بيعرف يوصف بالظبط اللي حاسس بيه .. ف لما يقول " مش عارف" بيبقى صادق جدًا .. الشعور الوحيد اللي هو فاهمه هو التوهة والحقيقة الوحيدة اللي قادر يلمسها إن هو جوا متاهة .. دخل ليه أو هيخرج امتي أو ازاى مش عارف ، ولأن كل واحد بيدور في متاهته لوحده ولأنه مش عارف يخرج ولأنه تعب من كتر الأسئلة وتأليف تبريرات بتزود توهانه .. ف بيسكت/يبعد/بينعزل/بيتقوقع .. وفي نفس الوقت جواه بيدور على البراح.

- كل واحد فينا بيحتاج وقت طويل أوي عشان يقدر يفهم ويفسر إحساس واحد بس من كل الأحاسيس اللي مقيدة حريته وانطلاقه ف ليه كل واحد بيبتكر إنه يقدر بسهولة يفهم ويفسر إحساس غيره بالخوف/الوجع/اليأس؟! ليه كل واحد بيكون متأكد إن كلامه معاه، نصايحه، حكاية تجاربه ، هتأثر فيه أو هتحرره من

أحاسيس مكلمشة جواه ، هتخرجه من المتاهة اللي بيدور فيها ، هتوصله للبراح اللي هو محتاجه؟! هو محتاجه؟!

- متهيألي أهم حاجة هتساعدك في تخطي ممرات وطرق المتاهة بأقل الأضرار الممكنة : إنك تكون صادق وصریح مع نفسك ومع غيرك حتى لو مش عارف تشرح أو تفسر مشاعرك .. على الأقل ماتحاولش تجملها أو تداريها أو تعيد صياغتها .. لأن عاجلا أو آجلا كل محاولاتك للهروب هتخلص/هتنتهي .. وهتفضل الحقيقة بس مشوّهة

- أنا مقدرتش أحدّد إذا كان الكتاب عبارة عن قصص، حواديت، حوارات ، خواطر ، مقالات ، فضفضة ، تخاريف ، - حاسة إنه كوكتيل من كل ده - بس متأكدة إن كل تدوينة فيه هي عبارة عن متاهة أو طريق متشعب وملتوي في المتاهة الكبيرة .. فـ عشان كده نهاية التدوينة مش لازم تعجبك أو تقنع بيها .. خليك فاكّر إنّ هي متاهة و مش لازم إحساسك أو أفكارك بيها/فيها يكون متفق مع غيرك .. الهدف منها إنك تتعرف /تتفهم/تقبل مشاعر/أفكار غيرك .. وإن كل واحد بيمشي في الطريق /الممرّ اللي شايف إن هو مناسب ليه عشان يوصل للبراح .

- التدوينات كوكتيل من الفصحى والعامية بس طبعا بنظام .. يعني مش داخلين في بعض ، وهتكون بين ولد و بنت .. وأغلبها هيكون على لسان البنت (على أساس ان اللي كتبت التدوينات بنت). البنت بتكون حاسّة بـ إحساس معيّن وليكن الخوف وبتحاول توصفه للولد، ومن خلال حوارهم مع بعض بتطلع بنتيجة بتفهمها شوية/بتنور لها الطريق قدامها عشان تعرف تكمل مشي في طرق المتاهة وتوصل لـ شوية براح.

- حلو أوي إنك تكون حاسس إن قدامك براح حتى لو كنت عاجز أو مش عايز
تجري.

" نحتاج أحياناً إلى حياة كاملة للتعمق في إحساس أو لفهم كل ما يخر به قلب الآخر. ولعلّ عنادنا وعمانا أكبر من أن نضمن النجاح في ذلك! لكن يحدث في أحيان أخرى أن نختصر المراحل اختصاراً عجيماً ، يحدث ذلك في لقاءات استثنائية في لحظات متفرّدة يُقال أثناءها كلّ شيء من خلال قلبين ينبضان ونظرتين تتقابلان "

لـ جيلبرت سينويه

المقدمة

عزيرى القريب - البعيد -

عن ماذا أحدثك؟

عن يداي التي أصبحت باردة كالثلج بعد أن كانت دافئة تُرَبَّت على موضع الألم
 فـيهدأ، عن عيني التي أصبحت بائسة لا حياة فيها بعد أن كانت تُبَثَّ الشَّغف/الحياة
 بداخل كلِّ من يراها، عن روحي المنهكة من وجع لا يَفنى، عن دموعي العنيدة التي
 ترفض الاستسلام والتزول تُتخفَّف قليلا من حُرقة الألم الذي يمزق دواخلي، عن
 التفاصيل المؤلمة الملتصقة بدواخلي والتي مهما حاولت معها ترفض الرحيل بدوني، عن
 أحلامي التي رغم بساطتها لا تكتمل، عن حطامها المتكسر على طرقات الحياة، عن
 قلبي المنهك من كثرة الطُّرق عليه و عالمي المليء بـ الآخر، عن أرواح سكنتني بقوة
 وغادرتني بلا عودة، عن كثيرين منحَّتْهم حرّية التمكّن من روحي فـ خسروني
 بمهارة فائقة، و عن آخرين ظنوا أنّي أبحث فيهم عن قصة تُحكى وهم في الحقيقة
 أمدوني بمنحزونٍ من الوجع والخاوف والأوهام والخبرات المؤلمة دون أن أمرّ بأيّ تجربة
 حقيقية .. فبتُّ منفعله دون أن يُفعل بي، عن الخيبات التي فُتتْ أيّ روابط بيني وبين
 العالم الخارجي، عن السّنوات التي تمضي والفرص التي تضيق والكلّ يقنعني أنّي بحاجة
 لأن أمنح الفرصة فرصة .. بأنّ كلّنا متنا بحاجة إلى الأخرى .. هي بحاجة لأن تتحقق وأنا
 بحاجة لأن أجد بداية جديدة معها، عن أنني أفلعت عن الشغف والحياة، عن الرغبة

المُلحَة في التَّأْي والرَّحِيل عن كلِّ شيء ، عن أَنِّي في أَكثَر فترات حياتي هَشاشة ، عن أَنِّي أَفقدُني على مهل والإحساس بذلك والعجز عن فعل أيِّ شيءٍ منهُك جدًّا.

أم أَحدَّثك عنك أنت ؟

عن هذا الذي كان مميّزا في نظر - قلبي - ي .. ولكنّه خذلني حين عرفني / قرأني غيرهُ أَكثَر منه فـ صرت أَخلق مساحات تلاقٍ دافئة بين الكلمات والسّطور لعلّ ما لم يفهمه بالروح يفهمه بالحس.

(١)

نقطة الأعودة

بعض الكلمات /التفاصيل /المشاعر مُرهقة جدا .. لا تتحمّل تجاهلك لها ولا تقبل بأن
تُدفن في أكثر الأماكن بداخلك عمقا .. ف تظل تُؤلمك بأن تجعلك تشعر بـ حين
مُباغتٍ للبوح بها .. وأنت تظل تُراوغها .. تكتئبها وتمسحها، وتكتئبها وتمسحها حتى
لا تجد مفراً من إطلاق العنان لها .. وحينها لا تعلم أسيريك هذا القرار أم سيؤلمك
أكثر من الكتمان .. ف ببوحك هذا قد اتخذت طريق أحادي الاتجاه .. ولا سبيل
للتراجع عن المضيّ فيه !

- غبي!

- مالك؟

- هيجنني .. حكته عني كتير /شرحته نفسي كتير /بسطته نفسي أوى ... وهو
مُصرّ يبقى أعمى بيا/جاهل بيا مش عارفة ليه مُصرّ يتعامل معايا بطريقة تقتل أي
مشاعر جويا ليه!

- طب انتِ صرّحتيله بأي مشاعر حاسّاه ناحتته؟

- متهيألي البوح بأيّ مشاعر هيبقى سخيف/مبتذل أوي قصاد كلّ المواقف/التصرفات
اللي بظّهرها وهو مش يفهم

- يمكن فاهم ويعمل نفسه مش فاهم ، يمكن مش جواه ليك غير مشاعر صداقة.

- كل خطوة بيخطيها ناحيتي مش بحسّها بـ هدف " قرب/تعميق الصداقة "

بحسّها مشاعر إعجاب/انجذاب بس صاحبها تايه عن الطريق الصّح اللي آخره "حب"
أو عارفه بس خايف يمشي فيه ويقرب أكثر لـ يلاقي حيلة صدّ قدامه .. فطول الوقت ماسك كشّاف مع إن الدنيا منوّرة بس هو مش شايف .. فـ بينور بيه وكلّ لما يقرب خطوة يرمي طوبة -قبل ما يقرب الخطوة الثانية- عشان تعرّفه إذا كان الطريق سالك ولا هيتخبط في حيلة صدّ.

- يعني خايف يبوح لـ يلاقي منك صد /رفض؟

- تقريبا .. بس للحق هو شاطر أوي في التلميح وجس التّبص.

- يعني إنت فاهمة تلميحاته وبتعملي نفسك مش فاهمة ؟

- لأ مش بعمل .. هو عارف إني فاهمة .. و مستني منّي إشارة تأكد له إني مش

هرفض لو صرّح.

- وإنت هتعملي إيه؟!

- مش عارفة .. خايفة أسحله يقرب فـ تكبر المسافة اللي بتفصل بيني وبينه ويبقى

مستحيل نوصل لـ بعض ... وخايفة أبعد وأنا جوايا بتمنى نتلاقي فـ أندم لما أوصل

لـ نقطة اللاعودة.

- نقطة اللاعودة! ازاي؟

- لما تقرّر إنك تبعد أو تتجنب حاجة/شخص/شعور/طريق بس من جواك حاب

توصلها .. بالصدفة أو هي تصر إنها تدور عليك وتلاقيك .. ولما يحصل عكس اللي

جواك - اللي إنت قرّرتّه - وقدرت تبعد ومش اتلاقيه بأي طريقة.. يبقى جواك وجع

(٢)

بره الصورة

ربّما كنت غامضة بعض الشيء ... و قاسية في كثير من الأحيان ولكنني في الأصل
أنى رقيقة... وتلك القسوة لأنني لا أستطيع احتواء خوفي ... وذلك الغموض لأنني
تعرّضت كثيرا للخذلان فـ كن رجلا يحتويني حتى أصير أهدأ ... و عندما يغلق العالم
أبوابه أمام عينيّ شاركني لحظة " ثقة ويقين " في طريقي المظلم ... لـ نرى معا
التفاصيل التي يكمن فيها الله.

- تعالي عشان نتصوّر
- لأهات أنا أصوّركم
- كنتِ قاعدة ورا أوي ليه كده؟!
- ما إنت عارف مش بجب أكون ملحوظة/متشافة أوي
- بس الكراسي الخلفية مش ليك..
- ليه، صغيرة؟! طب ما أنا خسيت
- مش بهزر ... هتفضلي لحد امتي مكنتية بالهوامش والأدوار الثانوية؟!
- لحد ما أحس اني قادرة أواجه من غير ما تصدمني خيبة الأمل اللي راكبة جمل

- أيوه امتي يعني؟
- أنا ليه حاسة إن العلاقة بينا بقت عبارة عن اقتحام منك .. ومقاومة مني؟! مش كفاية ضغط بقى؟
- لأ مش كفاية ، وعندك حق هي بقت كده فعلا ... مثلا بقالي كتير أوي بقولك نفسي أشوفك أو أسمع صوتك و إنتِ ولا معبراني
- طب ما أنا جيت أهو
- وأنا كنت مفتقدك أوي .. ووجعني تجاهلك ليا.
- عارف لما بيحصل عندك ضمور في مهارات التواصل مع الآخرين .. يبقى صعب عليك أوي نفسيا تخرج من قوقعتك .. ولو حصل واضطريت تخرج يبقى كل تفكيرك منحصر في إنك عاوز/محتاج جدا ترجع .. لأن وجودك في مكان فيه ناس بيولد جواك قلق بيضغطك ويحسسك إهم لو سكتوا يبقى إنت اللي لازم تتكلم، إنت اللي لازم تقطع الصمت ده .. وفي نفس الوقت مجرد إن حد يتكلم معاك بيحسسك إنك في ورطة ... لأنك بتكون خايف ومتوتر وتايه ومش عارف تجمع كلمتين على بعض ترد بيهم .. و لأنك بتتعب أوي وانت بتحاول تهدي نفسك عشان تقدر ترد على مكاملة أو رسالة بحاجة غير الصمت .. وبتفشل مع إنك جواك صخب عالي من الأفكار والأحاسيس ونفسك أوي تشاركها مع حد بس مش عارف تعبر عنهم وكأن فيه قوة مخفية بتمسكهم وتحبسهم جواك وإصرارك وإرادتك مش بيقدروا يحرروهم .. ولأنك في النهاية بـ تُتهم بأنك شخص شديد الغموض أو شديد الغرور ولا حد بيصدقك أو يساعدك لما بتقول أنا عندي مشكلة في التواصل ... ف لا إراديا بـ تلاقي نفسك بدال ما تبذل مجهود في الخروج من قوقعتك .. بتعمل العكس .. بتبذل مجهود في إنك تقفل كل الأبواب والشبابيك وتسد كل الطرق المفتوحة للخروج وبتتفنن في إبعاد أي حد بيحاول يقرب ... وتبدأ تحاوط نفسك بالكتب ، الموسيقى ، الرسم ، التصوير ،

الألوان ، الطبيعة ، الحيوانات الأليفة ، ... وكأنك بتستعيض بيها عن الناس اللي مش قدروا يتفهموك .. في البداية بتحس بالاكْتفاء معاهم .. لأنهم بيساعدوك تتخيل وتنسج أحاديث/حوارات/أحداث/قصص من اللاشيء .. فـ بقيت مش محتاج حاجة من برا و مش مضطر إنك تخرج .. لكن مع الوقت بتكتشف إنهم مش بديل للبني آدمين واللحظات الحلوة اللي ممكن تعيشها بجد - حقيقة مش خيال - معاهم ... بس لأنك سكت أكثر ما اتكلمت ، ووقفت أكثر ما مشيت ، وبعدت أكثر ما قربت ، وهربت أكثر ما واجهت ، وراقبت أكثر ما كنت جزء من المشهد مش هيكون سهل عليك تظهر في أي لحظات مبهرة وإن كنت إنت اللي صنعتها وليك حق في الاستماع بيها .. وأي ضغط بيوترك بيخليك تبقى -لاإراديا- عدواني/غامض/تهكمي/قاسي وكأنها حيل دفاعية بتستخدمها للهروب/الحماية عالمك الداخلي من التلصص ..

أنا كمان مفتقدك أوي .. وكنت محتاجة أملّي عيني من لمعة عينيك .. ووداني من صوت ضحكك .. وروحي وقلبي بـ تفاصيلك ومعانيك الحلوة .. محتاجة أحكيك حاجات كتير وأروح معاك أماكن جديدة ... بس كل لما باجي أخطي خطوة برا قوقعتي بيضيع الطريق قدام عيني فـ أسكن أكثر في مكاني وكل لما أجي أحكيك /أتكلم/أناديك ... بتلخبط وتهرب مني خيوط الحكاية وفي الوقت اللي بحاول أمسكها تاني .. بيدوب كل الكلام ويقي بس اللاشيء وكل لما أتخيلني/أكتبني معاك ألاقيني براقب أكثر ما بكون جزء من الصورة/المشهد/الحكاية..

(٣)

حوض سمك

عندما شكوت لك عجزتي عن سدّ الثّقوب في السفينة التي تقلني أو الحد من تزايدها... أخبرتني أنّك مُدرك تماما لما أشعر به وأتّك ترغب في أن تكون بجانبني وتحمل هذا الثقل عن كاهلي .. فـ أردت أن أسألك: " إن هاجت الأمواج وعصفت الرياح وساءت الظروف هل تعدني أن تكون هنا؟ " .. ولكنني تراجعته.. أعلم أنّ رجولتك ستُغريك لتعدني بأنك ستبقى إلى جانبي مهما تقلبت بنا سفينة الحياة.. ولكن ربّما بعد ذلك تكتشف أنّك غير قادر على الوفاء بوعدك.. و ترحل لتنجو بنفسك من الغرق معي.

– حاسس إن نفسي أكون مسؤول عنك

– ياااااه مسؤول مرة واحدة !

– أه وفيها ايه يعني؟!!

– تعرف أوقات كثير بحس إن جوانا عامل زي حوض السمك الحوض هو القلب

.... والسمك اللي جوا الحوض هي المشاعر والأحاسيس والميه هي الروح ..

طول ما الحوض سليم .. والميه موجودة ونقية .. هي فضل السمك اللي جوا صاحي

وبيلعب وفرحان .. ممكن تنطيطه ولعبه في الميه يوجعنا شوية بس ده بيظمننا لأنه بيدلّ

إنه حي وبيتنفس ومشتاق إنه يتنطط في حوض أوسع وميه أكثر .. واحنا دائما بنهديه

ونوعه إنا هنعقله أمنيته لما نلاقي حوض مناسب ينفع يكمل حوضنا وميته متعكرش
 مية حوضنا .. بس المشكلة إن بلور الحوض رقيق أوي .. أيّ لمسة خفيفة بتعمل فيه
 خرم ممكن يتسرب منه الميه ولو مش لحقنا وعالجنا الخرم ده ممكن المية كلها تتسرب
 ويموت السمك .. وطبعاً مش أيّ حد يقدر يعالج الخرم ويكمل الميه اللي نقصت
 ويحيي السمك اللي مات فـ عشان كده بسرعة لازم نلحق الضرر قبل ما يزيد
 المشكلة الكبيرة بتحصل لما اللمسة مش بتكون خفيفة .. يعني ممكن تكون أزيد شوية
 لدرجة أنها تكسر الحوض تحت صغيرة أوي .. صعب أنها تتجمع تاني .. صعب أوي
 .. فـ ازاي حد هيقدر يجمع شظايا البلور دي وهو عارف إنه هيتجرح ويترف
 ويتوجع ومع ذلك يحاول بكل طاقته مرة واتين و.... إنه يلزقها ويرجعها زي الأول
 ؟! ازاي حد يقدر ويختار بإرادته وكامل وعيه إنه يمسك في كيان هش شبه ميت ويديله
 من نفسه وروحه وكيانه ومن كل حاجة جميلة جواه عشان يرجع الحياة جواه تاني؟
 ازاي حد هيكون عنده البصيرة والصبر والحب فيقدر يشوف أصلك الحلو قبل ما
 تتكسر فـ يشوفك جميل أوي وإنت في أسوأ حالاتك ويستحملك ويعيد خلقك من
 جديد و ولا مرة يزهد أو يبعد أو يمتنك في يوم إنه استحملك؟!
 عارف ليه لازم يستحملك مع إنه هو اللي بيتعور وهو بيجمع أجزاءك المتكسرة؟!
 لأنك كنت في يوم من الأيام عبارة عن كتلة من الأحاسيس موجودة في قلب وروح
 إنسان ... بس قلبك اتكسر وروحك جفت وكل الأحاسيس اتبلدت .. فـ بقيت
 مش قادر تساعد نفسك وإنت شايفها بتموت ولا قادر تتفاعل مع أيّ حاجة بتحصل
 حواليك .. لأن البرد والوحدة والجفاف محاطينك لحد ما اتعودت عليهم .. سكنوك
 لحد ما بقوا أصحاب البيت وليهم عليك حق إنك تطيعهم .. فـ ازاي هتقدر تطردهم
 ؟ وازاي هما هيسبيوك من غير ما يوجعوك ويدمروا الباقي منك؟ فـ عشان كده لازم
 يستحملك لأن عشان تقدر تسمحله وتساعده إنه يجمع قلبك اللي اتكسر ويروي

روحك اللي جفت ويصحي مشاعرك تاني معناها إنك بتسمحله يوجعك بشكل صعب
أوي إنك تتحملة.

...

فـ ماينفعش تتحمل مسئولية حاجة/حد من غير ما تكون مدرك إنك مقبل على إيه ..
عشان زي ما يقولوا ماتجيش تحكلها تعميها وعشان ماحدث بيقدر يستحمل
خوف/قلق حد وكل تعقيداته وأي مشاعر غير مبررة غير اللي بيحبه أوي وشايف في
نفسه القدرة إنه يريحه ويطمّنه ويحوّل كل العتمة اللي جواه لـ نور ... بس مش
معنى كده إن اللي مش هيقدر يستحملة هيبقى إنسان وحش وضعيف أو معندوش
قلب وإحساس ... لأ طبعا .. هو بس مقدرش يستوعبها .. تجاوزت حدود إدراكه
ومشاعره ونفسه وببساطة مقدرش ... فـ أفضل تصرف ممكن يساعد بيه هو إنه
يكون صريح مع غيره ومع نفسه بأنه مش أد المسئولية دي.

(٤)

عناق ليس أبدي

" عزيزي

لم نكن في اللجنة حتى تتهمني بأثني تسببت في إخراجك منها .. فقط حاولنا التحليق في
سماء الخيال .. أطلقنا العنان لـ جناحيّ روحينا .. وحلّقنا معا .. بحشا عن الأحلام ..
تلاقينا وإياها .. تعانقنا بشوق .. شعرنا بالدفء والجمال يتسرّب بدواخلنا .. وكان
من الضروري أن نفترق لـ نعود إلى أرض الواقع .. فـ لِمَ الغضب إذن ؟!
أعلم أنّه ليس عبثاً أنك كنت تحاول احتوائي بكلمات حاملة خيالية تبدو من روعتها و
شدة صدقها كأنها حقيقة واقعية مُعاشة حقاً ولكن ألا تتفق معي أن شدة الاستغراق
فيها تُحرر قيد مشاعر- ليس لها متنفس على أرض الواقع- ما إن تنطلق من عقالها لن
يستطيع أحد أن يوقفها .. فـ تُنهكنا وجعا حتى الموت !
أعلم ما سيكون قولك .. نعم أنت محق في كوني فتاة غريبة الأطوار تميل إلى تعقيد
الأمر كثيراً .. لم أستطع تقبل أن أكون كـ فتاة مُراهقة تبحث عن أحلام اليقظة
الواهية لـ تُهدأ خواءها ولا تُشبعه .. فـ اختفيت من المشهد برمته تاركة لك مساحة
تقول فيها ما تشاء .. فـ لا تدعو لي .. لا تدعو الله أن يُسامحني .. بل إن أردت وإن
كان يُريحك " سبني والعني " كما شئت .. وألقِ بكل تبعات واقعنا القاسي عليّ ،
كلها بلا استثناء ! "

- وحشتيني

- أد إيه؟

- أد اشتياق السحاب لـ حضن السما

- عارف من زمان أوي وأنا بحب أشوف السّما وهي حاضنة السحاب - سبحان الله

على الإبداع - بس مرة شوفت السّما مليانة سُحب كثير أوي .. غطتها كلها

ومخلتش ولا جزء صغير باين منها .. ف اضايقت أوي من السّحاب .. من وقتها بقيت

بحب أشوف أكثر السّما صافية من غير سحاب .. بقى عندي اعتقاد إن السّحاب ده

- ولو إنه حبيبي وجميل وأصله نقي - بيجرح ويؤذي صفاء ونقاء السما .. ده غير إنه

بيعودني أشوف وأحس بجمال عناقه مع السّما وبعدين يمشى .. يتحول مطر .. ويسيب

السّما من غيره .. وحدها أوي .. جمالها ناقصه يكمل بوجوده فيها .. زي لوحة البازل

اللي فيها قطع ناقصة ، يمكن احساسى - كالعادة - عقّد الموضوع .. بس حبيت أوي

عناق السّحاب والسّما .. اتمنيته يكون أبدي .. وده مستحيل.

- مع الخيال مفيش حاجة مستحيلة.

- مش دايما الخيال حلو .. أوقات بيكون زي نقمة متنكرة في شكل نعمة.

- ازاي؟!

- زي ما فيه شعرة بين العقل والجنون، فيه شعرة بين حكمة الحلم وحماقته وبين رُقّي

الخيال وانهطاطه.

- الخيال والأحلام. حياة ، - مشاعر، لحظات ، تفاصيل ، ... - عاجزين إننا

نعيشها مش حماقة وانهطاط أبدا.

- صح إن مشاعر زي الحب ، الحنان ، الدفء ، الطبطة ، الحزن ، الأمان ،

الاطمئنان ، الاحتواء... كلها مشاعر جميلة جدا و أكيد مفيش إنسان على وجه

الأرض مش محتاج ياخذها ويديها.. وغالبا -واقعيًا- مش بيحصل كثير اكتفائنا بيها

.. فبتخيل ونحلم أوقات كثير .. بس متهياي الأحلام ممكن تتحقق لو حكمانها بشوية عقل .. والخيال هيكون أحلى لو زودنا الرقي ، أنا زيك بآمن بمقولة " ولنا في الخيال حياة " بس إنت بقيت مدمن خيال وأحلام يقظة .. مدمن دور " السحاب " .. بتحب تعانق السما أوي ومع إنك بتضيف عليها لمسة حلوة أوي بس من غير قصدك بتأذي نقائها وتجرحها لما بتعودها على جمال عناقك ليها وفجأة تسيبها فتبقى زي لوحة البازل اللي محتاجة قطعة محددة نفسها ترجع تكملها ، والسحاب كمان مش بيبقى سحاب .. بقى مطر بيحاول يصنع مع الأرض عالم حلو/عناق مثالي/لوحة تُحفة شبه اللي كان بيصنعه مع السما ومهما نجح في محاولاته بيلاقى فجوة بين اللي بينيه وبين اللي بيحس بيه فعليا .. حاسس إن مكانه فوق في السما كان مريح أكثر بس بقى ليه جذور رباطه تحت فيفضل دائما عايش في الخيال ويتمنى لو عناقه مع السما كان قوى كفاية إنه يوحدده فيها ومعها للأبد.

– أنا مش عايز أموت ناقص حلم .

– من حقتك ، بس إيه فائدة إنك تصحي أحلام / مشاعر – جواك وجوا غيرك –

ملهاش متنفس على أرض الواقع .. مش هتقدر تجسدها حقيقة على الأقل في الوقت الحالي .. فـ توجعك وتوجعهم وتضطروا توأدوها حية أو تبتدلوا مشاعركم في خيال مش هيحسّسكم بالأكتفاء!؟

(٥)

تُحَبِّني .. ولكن .. !

كم هو رائع أن تُحَبِّني !

ولكنّ الأروع أن يكون حبّك قادرا على شفاء جروحي، قادرا على احتوائي وطمأنتي ، ولكن إن كنت لن تستطيع، أو إن كنت ستزيد ألمي وجرحي وخوفي .. ابتعد !

تعرف يمكن أكثر حاجة بيخاف منها الطفل التايه إنه يمشي في طريق غلط يبعده أكثر عن بيتهم أو عن المكان اللي ضاع فيه لأن اللي بيحبوه أكيد هيرجعوا يدوروا عليه فيه .. والتفكير في كده بيطمّنه شوية .. ويمكن عشان كده بيفضل قاعد في أيّ ركن من غير أيّ حركة ولا خطوة وعينه اللي مليانة دموع متعلقة بالطريق .. رايحة مع الجايين والرايحين .. نفسه يلّمح حد يعرفه يوديه بيتهم أو يدله على الطريق الصح .. بس لما بيطول الوقت .. الأمل جواه بيقل .. والدموع بتفلت من عينه .. و تيهه ووجعه بيبان للغريب اللي احتمال يكون حسّ بضياعه وحبّ يساعده فقرب وبدأ يكلمه بس لأنه تايه و فيه مخزون من التحذيرات والمخاوف والأوهام جواه .. بيخاف من الغريب .. بيخاف يخطفه ، يبعده عن بيته ، يمشيه في طريق يتوهه ويوجعه أكثر .

هو نفسه ومحتاج أوي يروّح بيتهم .. بس مش عارف أي طريق يمشي فيه .. وروحه

خايفة من كل الناس اللي حواليه .. وكل لما الوقت يزيد الخوف والأوهام جواه
 بيزيدوا .. والجروح بتتفتح .. والوجع بيزيد وكأنه كبر وعاش كثير ومر بحاجات كثير
 أوي أثرت فيه في الوقت الصغير ده .. ومع إن أرواح الناس وقلوبهم بتتعلق بيه
 ويحاولوا يقربوا منه هو لسه خايف وتايه وكأنه مش سامع ولا حاسس ولا شايف ..
 ولو يقدر كان صرخ فيهم عشان يبعدوا عنه عشان يشوف الطريق كويس ونفسه
 يجري بعيد .. يهرب ميعرفش لفين .. بس بردو بيفضل ثابت في مكانه .. خايف يتوه
 أكثر .. ده غير إنه بقى عامل زي العصفور اللي جناحاته اتكسرت ومش عارف ولا
 قادر يطير إلا لما تخف ..

يمكن مستني يحس بروح يطمئنها فيسمحلها تحضن روحه الخايفة وقلبه الهش وتطبطب
 على جروحه ووجعه براحة من غير ما توجعه ولا تضيعه أكثر .. وفي نفس الوقت
 تمسك إيده وتجبره على إنه يمشي في طريق معين وطول الوقت تطمئه إن ده طريق
 البيت

..

تعرف إنت عندك حق .. الحب قادر إنه يشفي الجروح ، إنه يطمئن ، يريح ، يحيي ،
 بس محتاج صبر ووقت وجهد. يمكن الحل عشان تقلل المسافة إنك تحاول تنط
 فوق الحواجز اللي بتوجع بدل ما تحاول تكسرهما .. أو إنك تمشي المسافة دي بهدوء
 زي اللي ماشى على طرايف صوابعه خايف يدوس أو يجبط في أي حاجة تسبب
 دوشة ولخبطة ووجع للي بيحبهم .. والأهم من الصبر والوقت والجهد: القدرة ..
 إنك تكون قادر تعمل ده بكل حب ورضا وصدق، لأنك لو مش كده .. هتعمل
 دوشة ، وهتجبط ، وهتضغط على الجروح ، وبدل ما تساعد في شفائها هتكون
 السبب في أن الغرز تتفتح وتترف تاني وتالت والوجع يزيد ويمكن كمان الجرح يتعفن
 ومايقاش ليه حل غير البتر.

(٦)

حقيقة مبتورة

أن تخاف من "خوفك أو وجعك لـ أيّ سبب كان" إلى الحد الذي تنفتن في إخفائه عن نفسك.. عن إدراكك بوجوده.. عن ضعفك وعدم قدرتك على مواجهته.. فـ
يختفي خوفك.. ويظلّ إخفائك له أشدّ ألماً منه وأكبر من قدرتك على التجاهل والاستمرار في إنكاره.. وجعه لا يتوقف.. يُلازمك دائماً.. تشعر به ولكن لا تُدرك ماهيته.. يظلّ ينخر فيك من الداخل.. يحدث شروخاً عميقة في أعماقك.. وعندما تبدأ في إدراك ما يحدث لك يكون هو انتهى منك، ويتركك "آيلاً للسقوط"!

— ازريك؟

—

— مش رديتِ ليه؟!

— بفكر

— في إيه؟ في إذا كنتِ كويسة ولا لأ؟

— تقريبا

— ووصلتِ لـ إيه؟

- حاولت ألقى إجابة مختلفة غير - الحمد لله ، ماشى الحال ، بخير ، تمام ، كويسة، مش كويسة، زى الزفت - مش لقيت! اكتشفت إني لما بلخص حقيقة حالي في كلمات معدودة بعمل للحقيقة بتر.. ولأن شكلها وهي مبتورة بيكون بائس أوي فـ بتستخبي مني/عن عيون الكل.. وأنا كمان بهرب وأستخبي منها لأني بحسها بتشاور عليا وتتهمني بأني السبب في أنها بقت مبتورة وعاجزة عن أنها تظهر ، ومع إني ببقى عاملة حسابي وبتجنب كل الأماكن اللي ممكن نتلاقى أنا وهي فيها.. بس فيه حاجة جوايا بتدور عليها.. وبتجبرني إني أتواجه مع شكلها البائس ... ولما مش بتحمل قسوة نظرات اتقامها ليا، بهرب .. وبفضل ألوم جوايا لأنه جازف وواجهنا ببعض .. مع إنه زبي مكانش عايز يعرف/يشوف الجانب السيء .. يمكن كان محتاج يصلحنا على بعض .. بس ازاي .. ازاي ينفع أرجع الجزء المتور من الحقيقة .. تفكر ينفع؟

- أه طبعا

- ازاي؟ بأني أركبها جهاز تعويضي!

- مثلا

- وده مش هيشجعني على إني أبتز منها جزء تاني مادام بعوضها بعد كده!؟

- بس انتوا خلاص اتصاغتوا

- وإن كان .. هي عمرها ما هتنسى إني بترتها .. وأنا مش هقدر أستحمل نظرات

الاقام فـ مش هبطل هروب منها ومن جوايا اللي بيحاول يواجهني بيها وهكذب عليه وأقنعه إننا اتصاغتوا.

-يعني؟

-يعني إحنا أوقات بنكذب على نفسنا وعلى غيرنا وبنحاول نصدق الكذبة وبنقنعنا

كمان .. أصل إحنا بقينا شطار أوي .. يمكن لأن الحقيقة قاسية أوي .. فـ بنهرب

حتى لو بالكذب الكذبة بقت عاملة زي جدار بيناه عشان يفصل بينا وبين

الحقيقة .. بس الجدار كل يوم يظهر فيه تشققات .. وبيتها لك لحظة ورا الثانية ..
وانت/ي بتحاول ترمم فيه .. بس مع أول عاصفة هيحصل فيه تصدعات مش هينفع
ولا تلحق أصلا ترممه .. هيتهد خالص وانت عمال تجري زي المجنون بتحاول تدور
على أي حاجة تستخبي وراها بس مش بتلاقي .. وهتبقى إنت والحقيقة وبس ...
الحقيقة اللي هي إنك قعدت تبني في عمارة سنين .. التراخيص سليمة .. ماعملتش زي
غيرك وخالفت وزورت .. لأ إنت تعبت فيها وعشاشها أوي .. وقدام عينك اهدت
وانت معرفتش ولا قدرت تنقذ تعب سنين بقى تراب ولأنك مقدرتش تتحمل
تشوف تعب عمرك بقى تراب .. بنيت بينك وبينه حاجز من الكذب/الهروب /
دلوقت إنت مش عارف تعمل إيه ؟ تعمل زي ما عملت قبل كده: تبني حاجز تاني
بينك وبين الحقيقة و تكمل في الكدبة، ولا تواجه نفسك بالحقيقة اللي قدامك: التراب
؟ ، طب هتعمل إيه بالتراب، هتلمسه وتبلله بدموعك، ولا هتحاول تبنيه عمارة تاني؟
هو ينفع يتبنى من تراب عمارة؟ ولو ينفع، هتبقى عمارة أساسها سليم ولا هتبقى هشة
مليانة شقوق والمره دية يبقى إنت غشيت وبنيت عمارة أساسها مش سليم وتقع ..
واحتمال تدفن إنت تحت الأنقاض ومتعرفش تطلع تاني!؟

(٧)

مشاعر غير مبررة

كم هو قاسٍ أن تنفذ طاقتك وأنت تبحث عن كلمات تعبر بها عن حالك وتخفف بها
حملك.. وأنت تبحث عن طريقة تُمكنك من حفظ ما تبقى بداخلك من جمال.. وأنت
تمنع الزيف من اختراق دواخلك.. وأنت تترقب أي شيء يبعث على التور والحياة
خارج قوقعتك المظلمة/الآمنة.. وأنت تحاول التكيّف مع ظلمتها بعد أن فشلت وحدك
في إنارتها مرّات كثيرة.. وأنت تتشبّث بـ قشّة لن تُغنيك عن الغرق.. وأنت تتساءل:
"هل سيكون أفضل لي أن أستسلم؟ أيطيبٌ وجعي بالبوح/بالبكاء/بالصراخ /بـ ممارسة
الإهيار الإرادي؟! ومن سيصمد أمام هيستريا بكائي إن بدأت؟! من سيرغب في
صحبتي ويحتلمني بعد أن أنزع كل أفنعتي؟ من سيوفّر لي مساحة تسمح لي أن أغضب
كما شئت وأصرخ دون أن أستأذن وأقسو دون أن أطرّد؟ من سيساعدني على القيام
بكلّ هذا دون أن أتسوّل منه الحق في ذلك. " و تنداعى في غمرة بحثك عن متكأ..
وأنت لا تريد أن تهوي الآن .. لا تريد أبدا !

— عاملة إيه؟

— خايقة أوي

– ليه؟! –

– عارف دايمًا كنت بهرب من الأسئلة المعتادة/ المكررة عن حالي/أخباري بأجوبة
محفوظة بنطقها من غير تفكير وابتسامة مصطنعة كنت بعرف أتقنها أوي ، كنت بحس
إن مشاعر زي –الخوف، الوجد، الاحتياج، ... – مشاعر خاصة
وعزيزة جدا ماينفعش أكشفها قدام حد غير نفسي ، ماينفعش أسمح لحد إنه يشوف
روحي وهي بترتجف من الخوف ، وهي موجوعة وهشة أوي ، وهي عطشانة ونفسها
ترتوي بشوية حنان واهتمام .. وكنت بحاول أريّحها وأطمّنها بـ موسيقى هادية ،
كتاب مُعبر ، شيكولاته لذيذة ، مج نسكافيه سخن ،.... كل الحاجات دي كانت بـ
مثابة الحزن اللي محتاجاه واللي كالعادة مش لاقياه .. بس دلوقتِ حُضنها بقى بارد
أوي .. معرفش ليه؟ وماحاولتش أعرف! عادي يمكن تكون اتغيرت زيي .. تعبت مني
زي ما أنا تعبت ومليت من ردودي الروتينية والابتسامات المصطنعة اللي بهرب بيها
.... فـ لقيتني بسأل نفسي: "ليه لازم دايمًا أظهر إني قوية وكتومة؟ ليه مش
مسموحلي أعبر عن – أو أعيش –مشاعري واحتياجاتي الحقيقية ببساطة؟ ليه بقيت
مجبورة أخبيني وأبعديني أوي لحد ما بقيت بردانة وخايقة وموجوعة ومحتاجة ووحدني
أوي وفي نفس الوقت بثبت لنفسي ولغيري إني غير مكترثة؟ ليه مضطرة أواجه كل ده
لوحدني ؟ وعرفت الإجابة دلوقتِ منك: عشان السؤال اللي إنت رديت بيه على
وجعي/خوفي : " ليه؟! " .. السؤال اللي بيستترّف الباقي من طاقتي اللي مسنودة عليها
وأنا بحاول ألاقي طريقة أعبرك بيها عن القليل – القليل أوي – من دواخلي المنهكة
.. وفي النهاية هوصل للحظة الانهيار مع إني قولتلك إني خايقة لأني ماكنتش عايزة
أوصلها... وصلتها لأن كان صعب أوي ألاقي اللي محتاجاه إلا بإبداء أسباب وشرح
ملوش لازمة.

ليه كان صعب أوي ألاقي إيد تمسك إيدي وصوت يقولي ماتخافيش " أنا معاك/إنت
معايا "؟! ليه كان صعب أوي ألاقي حضن يسحب شوية من الخوف والوجع اللي
جوايا من غير ولا كلمة؟! ليه لازم كل إحساس/شعور يكون ليه سبب/مبرر؟! ليه
ماحدث بيصدقك لما تقوله مش عارف؟

أصلا كل ما تفهم/تحس/تستوعب/تحتوي/تعمق أكثر.. كل ما جواك
يتملى/يتلخبط/يضيق/يتضخم بـ مشاعر كثير بيتخانقوا مع بعض.. وتحس إنك محتاج
تفهم/تتنفس/ترتاح من غير ما تكون مضطر تبدي أي أسباب أو شرح هيفقدوك شوية
الطاقة اللي فاضلين واللي محتاجهم جدا عشان تتسند عليهم ومش تقع ... بس
صمتك/توهانك/خلقك اللي ضاق بيكتروا حواليك الأسئلة اللي إجاباتها بتكون ضايعة
أو مكليشة جواك ومش راضية تخرج... فـ مش بيتوفرلك الهوا/النفس/الراحة..
وجواك لسه بيضيق، لسه بيتضخم لحد ما تبقى خارج الوجود..!

...

فـ ماكانش مهم تعرف أي أسباب لـ إحساسي بالخوف أو الوجع أو الخنقة أو
اللخبطة قد ما مهم تشبع احتياجي الشديد للراحة والطمأنينة... اعترافي ونطقي بـ
مشاعري الحقيقية صعب عليا أوى... وفي نفس الوقت كافي جدا ليك عشان تفهم
وتوفرلي النفس قبل ما أهار/ قبل ما أبقى خارج الوجود.

(٨)

مانيكاز

كم هو شاق أن تكون مطالباً بتبرير كل إحساس - بالحزن/ الوهن/ الوجع - تشعر به... وأن تبرأ ذاتك من قهمة التواطأ معه على احتلالك بأن تنفي وجوده/ تخفيه في أعماق أعماقك/ تحاول صرفه من دواخلك غصبا/ بإجبار ذاتك على تصنع البهجة!

- بقالك كذا يوم مكتبة ... مش كفاية كده؟!

- هو بمزاجي يعني؟!

- أه مزاجك .. كل ما تعطي/ترعلي/تعتزلي الحياة.. كل لما هتضعفي وتبهتي وتكتبي

أكثر

- يعني أعمل إيه؟

- اضحكي

- طيب

- لا قولي "حاضر"

- شايف المانيكان اللي في الباترينة دي ؟

- مالها؟

- "من وقت ما حطوها في الباترينة وهي عمالة تحكي عن اللي حاساه/عن اللي عايشاه/عن اللي بتمر بيه بس لأنها واقفة ورا جدار زجاج .. ما حدش قادر يسمعها أو يحس بيها أو يلمسها ف بتضطر تتعامل مع كل اللي بتحسه لوحدها .. مع كل التفاصيل اللي بتملأها وتقلل البراح جواها/مع كل المشاعر اللي بتتخاقق مع بعضها وهي طول الوقت بتحاول تبعدهم عن بعض/مع الأفكار الكثير - عن كل حاجة وأي حاجة.. تخصها أو لأ - اللي بتخلي راسها هتتفجر من كتر الزحمة واللخبطة... أوقات بتتجح ف بتفرح وتبقى راضية أوي عن نفسها وعن الحياة وبيزود الأحاسيس دي جواها نظرة الإعجاب اللي بتشوفها في عيون الناس اللي بتتفرج عليها من برا.. وأوقات بتفشل في التعامل مع كل اللي حاساه ف بتحس إن الباترينة ضلمت وضائق.. المساحة المتاحة ليها بقى صغيرة/ضيقة عليها أوي ومش مخلياها عارفة تقف وهي مرتاحة.. فبتعيط وتصرخ عشان حد يساعدها بس لسه الجدار الزجاج حاجب صوتها/روحها .. ومن كتر التعب بتنام وهي معيطة وهي حاسة إنها هي اللي مسؤولة عن تعاستها - مش حد تاني - بس مش عارفة تعمل إيه عشان تخرج من الباترينة أو على الأقل عشان توصل اللي حاساه للناس اللي بيتفرجوا عليها من برا بنظرة اشمئزاز وبتصحى من النوم تلاقهم لسه بيتفرجوا عليها بنفس نظرة الاشمئزاز - بتاعت امبارح - من التراب اللي مغطيها ووقفها اللي مش معدولة .. وبعدين يمشوا ويسيوها ... ومش بيعدوا على الباترينة ولا تاني يوم ولا تالت ولا رابع وكأنهم بيعاقبوها عشان نصحوها تقف معدولة وتنفض التراب اللي عليها وهي مش سمعت الكلام وقالت "حاضر" ! تفتكر المانيكان كانت بتدور على الفهم أكثر ولا الإحساس أكثر كانت محتاجة نظرة الإعجاب ليها وهي فرحانة /راضية / ناجحة /جميلة ... ولا كانت محتاجة إنه يكون مسموح ليها تعيش كل المشاعر (الوجد والفرح ، الغضب والرضا ، الجمال والضياع ، الأمل واليأس)

من غير ما حد ينتقدها ويبيني بينه وبينها أكثر من حاجز زجاج... كانت محتاجة لما
تقدر تعترف بالجزء المظلم جواها .. إنك تتفضل عليها — حل صح ومنطقي ولا
كانت محتاجة أكثر تكون محسوسة أوي ومتشافة زي ما هي؟!
متهيألي المانيكان اللي بتسمع كلام الناس وحلوهـم المنطقية وتقول "حاضر" ... مش
بتعمل كدا عشان خايفة من عقابهم ولا عشان نظرة الإعجاب وحشتها ولا عشان هما
شاطرين وجابوا التايهة اللي فاكرين إنها غايبة عنها... عارف بتقول حاضر ليه؟
عشان فقدت الأمل في إهم يسمعوا صوتها ويجسوا بيها ، وعشان مستحيل أيّ كلام
قالوه أو هيقولوه هيفرق معاها أو يخفف وجعها /حزنها لأنها في الحقيقة مكانتش
بتدور على الحل ولا الفهم ولا المنطق كانت محتاجة الإحساس/العاطفة، تتحس
أكثر ما تتفهم .. تحزن/تعيط/تتوجع/تقع .. من غير ما حد يسخر منها أو يحقر من
شأن أيّ ظروف/تجارب/أسباب وصلتها لكده ، وعشان عرفت إن الكلام مفيش
أسهل منه .. كل واحد يفضل يمنخ ويفكر وينفع كذا وماينفعش كذا ... بس
موقف واحد هيمر بيه .. هيضغط على كل الكلام ويعمل في كل أفكاره شروخ كثير
فيتهد كل الرغي اللي قاله، موقف واحد هيوضح إذا كان متسق مع نفسه ولا لأ ..
هيوضح مدى صدق كلامه لما يأكدها بأفعال موازية ليها .. موقف واحد هيصدمه بـ
صورة بشرية فيها ديفوهات كثير كانت مستخية .. بس في وقت ما لازم تظهر ..
موقف واحد هixelيه هو كمان زي المانيكان يقول حاضر عشان يريح ويرتاح"، فـ
حاضر هضحك، إيه رأيك فيا كده .. حلوة؟!!

(٩)

أرتيكاريا

أندري يكاد يقتلني ذلك الشعور الحائر بين توقي للاقتراب منك/للتعمق بالإحساس
بك أكثر/ لأن يكون بإمكانك معرفتك أكثر.. وبين حدسي الذي يخبرني أن لا أقترب/لا
أتعمق/لا أتعرف عليك.. ف كلما تُردد " القرب محبة " تتباطأ خطواتي عن المضيّ
قدما تجاهك ليس خوفا من الاقتراب ولكن عجزا عن الاستيعاب.. ربما لو أصدقني
بـ حقيقة أن القرب كاشف حد الألم.. وأنه غالبا ما يدفع للبعد... لما كان يؤخرني
شيء عنك.

— هـ تفضلي لـ امتي واخدة مني جنب؟! —

— كده أريح.

— أريح! ازاي وانتِ دائما كنتِ بتقولي إن وجودي بيفرحك؟! ولا نسيتِ؟

— لا مش نسيت .. صح وجودك لحد دلوقتي ممتع .. بيفرحني بجد .. بس فيه مرة

قولتلك إن وجودك مُريح/أمان؟

- مش فاهم .. وضحي أكثر
- قربك ووجودك ممتع و غير مُريح في نفس الوقت .. بـ معنى مثلا لو إنت بتحب
الشيكولاته بس بتسبلك ضرر بسيط .. ولأنك بتضعف قدامها هتاكلها واللي يحصل
يحصل بقى .. يعني هتستمتع بطعمها وتأثيرها بس بعدين لازم تتحمل الأرتيكاريا
الجلدية اللي هتسببها لك .. هي مش هتقعد كثير .. هتظهر فجأة وتختفي برضو فجأة،
بس عشان تظهر في مكان تاني وتالت وهكذا.. و سواء كان تأثيرها عميق أو لأ
هتفقدك المتعة اللي أخذتها من الشيكولاته .. وعشان مش تفقدها لازم تتجنب وجع
الأرتيكاريا فـ هتاخذله دوا يخدر جزء من إحساسك و تكتفي بالجزء اللي فاضل من
الإحساس يديك مُتعة بس مش كاملة.

- مُتعة مش كاملة!

- أه إحساس عدم الراحة بيسحب من إحساس المُتعة اللي بحسه معاك .. بـ معنى
مثلا لما بتكون بتتفرج على فيلم ويكون ممتع أوي بس بتيجي في النص لقطات مؤلمة
أوي وإنت مش هتقدر تستحملها من غير ما دموعك تنزل وقلبك يوجعك فـ لا
إراديا بتلاقي عينك غمضت أوي وإيدك على ودانك لحد ما اللقطة تعدي بس المشكلة
لما ترجع تفتح وتسمع هتكون خلاص طلعت من المود الحلو، فقدت المتعة .. وعشان
ترجع تاني محتاج تجبر نفسك إنها تندمج تاني لحد ما تلاقيها... بس يا ترى نفسك
هترضى تدور عليها ولا هتعمل زي الأطفال، تدبب رجلها في الأرض وتقول مش
هالع/مش عايزة أحسها وأتعود عليها وبعدين تروح مني!؟

..

مش عارفة حقيقي ليه إحساس عدم الراحة بينظلي زي عفريت العلبة وياخد من متعتي
بـ قربك .. يمكن لأننا مترين على إننا نقيم ارتباط شرطي بين المتعة والألم .. زي مثلا

لو ضحكنا كثير يبقى أكيد هنتكد بعد شوية. يمكن أنا محتاجة أقاوم أي مخاوف
وأسرّع خطواتي تجاهك وأمشي في الشوارع جواك وأتعمق وأتأمل كل ركن وكل
تفصيلة... ووقتها إمّا إحساس الغربة وعدم الراحة هيختفي وتتقبالي المتعة كاملة... أو
هيفضل يزيد ويسحب من رصيد المتعة لحد ما توصل للصفر، وأنسحب أنا من غير
ولا كلمة لنقطة الالعودة.

(١٠)

إفلاس

وإن كنت أنا هنا وأنت هناك ولا أستطيع طمأنتك بوجودي الملموس بجانبك ، وإن
كان صوتي بارداً وروحي مُنهكة وقلبي فارغاً ولن أستطيع بثّ الدفء والنور
بداخلك، فهل يشفع لي عندك سُكونك بداخلي في مكان لن يمسه بشر مهما كان؟!!

حلو أوي إنك تكون عايش إحساس الأم والأب اللي بيحبوا ويبدووا ويراعوا ويطببوا
ويحاولوا من غير ما تستنى مقابل.. لأنك حابب تعمل كده .. وأوقات بتكون حاسس
إنك لازم تعمل كده.. ويمكن كمان مخلوق عشان كده.. دورك و قدرك اتحددوا
وبقوا كده.. ودايماً إحساسك واقتناعك بالدور ده بيخليك تآمن أوي بإن " وجعلك
بيوجعني أكثر ما وجعي بيوجعني " وبالتالي بتكون حاسس إنك إنت اللي مسؤول إنك
تفرح حد زعلان .. وتطبب على حد موجوع .. وتدي شوية أمل وتفاؤل لحد محبط
ويأس... وتمسك إيد حد تايه.. وتحضن أوي حد وحيد.. الخ ، حلو الاحساس ده
على فكرة على قد ما بيملك وجع لما بتبقى عاجز عن تخفيف وجع حد أو تفشل في
إنك تقلل أيّ مشاعر وأفكار سلبية جواه وتعباه.. بس لما بتنجح وتريح حد بترتاح
إنت كمان.. بتحس بالرضا من جواك إنك قدرت تعمل حاجة حلوة.. إنك بجد

وجودك في حياة ناس كثير مهم.. وأهم حاجة إنك بتحس إنك إنسان.. وعلى فكرة مش لازم يكون فيه حد بيعمل معاك كل ده عشان تكون إنسان بيحس ويقدر يهتم بغيره أوي كده.. لأ بالعكس غالبا إحنا بندي غيرنا أهم المشاعر اللي بنكون محتاجينها أوي.. مش دايمًا فاقد الشيء لا يعطيه.

إنك تكون قادر تدي الشيء ده مع افتقادك ليه وعدم وجوده في حياتك هو المهم.. هو سر قوتك.. القدرة على الحب والعطاء موجودة على الرغم من كل حاجة واجعاك وحاجات تانية محتاجها.. يبقى ليه ماتستخدمهاش؟! إيه فايدتها وانت مش بتستخدمها في إنك تسعد وتساعد وتقوي وتطمئن وتريح بيها غيرك؟! بخل مثلا..؟ يقولوا أسوأ أنواع البخل هو البخل في المشاعر، والشح ده بيخليك ضعيف أوي.. ف خلي بالك.

المشكلة بقى لما بتقع إنت.. لما كل قواك بتنهار.. لما بتبقى نفسيا حاسس إنك مبقتش قادر تعمل ده.. لما تحس إن كل المشاعر الي جواك دي خلصت فجأة.. فقدت قدرتك على الحب والعطاء ومعها فقدت قوتك اللي مسنود عليها.. وزعت كل حاجة جواك وبقيت مفلس من غير ما تحس ولا تبقى عامل حسابك تخلي حبة ليك ينفعوك وقت الزنقة دي عشان يساعدوك تقوم وترجع تأدي نفس الدور تاني.. وقتها بتكون ضايع أوي.. ومش عارف تعمل إيه، تتبرى من كل اللي اتبنيتهم.. ولا تمثل إنك قادر تدي وتراعي ووقتها هيكون تمثيلك مزيف أوي وهتكشف أكيد، ده غير إنك مش هتقبل تعمل كده.. مش هتقبل غير إنك تعيش الحاجة اللي بتقدمها دي بكل ما فيك..

عشان تعملها صح أوي مش تقضية واجب.. طب إيه الحل؟ تستلف..؟ بس ممكن تكون مش بتحب تستلف شوية مشاعر دافية وإيجابية من حد.. مش تكبر ولا غرور، بس إنت مش متعود تقول أنا تعبان أوي ومحتاج أنا كمان، مع إنك ممكن تكون أحوج

الناس لكل اللي كنت بتعمله.. مثلاً في الوقت ده بالذات بتبقى محتاج حد يهتم بيك
أكثر ما إنت قتم بغيرك.. بس إنت اتعودت تصبر /تستنى ربنا يرزقك من غير ما
تطلب .. زي تعفف الفقير اللي ربنا ذكره في القرآن.
متهيألي إن الحل الأول أريح ليك -تتبرى منهم- .. لأنك نفسياً مش هتتحمل حد
يعاتبك إنك ما بقتش قتم زي الأول ولا إنت قادر ترد ولا تبرر. إنت أصلاً بيوجعك
البوح باللي جواك، — اتبرى منهم أحسن.. ابعده على قد ما تقدر .. أكيد هيحسوا
بالقهر لما تتخلى عنهم وتسيب أيدهم في نص الطريق.. واحتمال يكونوا وقتها
موجودين وخايفين وتايهين ومحتاجينك... بس إنت كمان افتكر إن ايدك بقت باردة
أوي مش دافيه زي الأول.. وروحك بقت منهكة أوي مش حمل وجع أكثر.. وقلبك
بقي متفتت حتت وكل حته مليانة وجع بعد ما كان مليان حب.. وعيونك وابتسامتك
بقوا باهتين جامدين بعد ما كانوا بييشعوا حنان وحياء.. مش هتتحمل وجعهم زي
الأول ولا هتعرف تريجهم.. غصب عنك.. بص، اسمع كلامي إنت مش هتقدر تمثل
ولا تعافر أكثر من كده، بس كده هما هيزعلوا. أه ومش هيفهموا ولا هيقدروا ولا
هيحسوا.. هما بردوا معذورين.. إنت عودتكم على حبك الغير مشروط وفجأة سبت
أيدهم في نص الطريق.

.....

تفتكر لو أيديكم الباردة حضنت بعض أوي هتدفوا، هيقبل الوجع، هتحمسوا بالأمان،
هتفرح قلوبكم، روحكم الموجهة هترتاح ، هتوصلوا لبر الأمان ... تفتكر !؟

(١١)

طرح دبلان*

"ما عدت أدرك أصل الحكاية لأن الحقيقة شيء ثقيل "

لـ فاروق جويدة

- تفتكري إيه يخلي إنسان فجأة حاسس نفسيا إنه مبقاش يقدر يدي .. بعد ما كان
بيفرح أوي إنه قادر يطلع جزء -ولو بسيط- من كل حاجة جواه ويديها لغيره من
غير ما ينتظر مقابل .. بعد ما كان بيسيب نفسه للإحساس ده لأنه حلو، ولأنه غير
من جواه أوي.. ولأنه خلاه يتصالح مع نفسه ويجبها.. إيه خلاه يفقد كل ده!؟

- مش قادر ولا مش عايز؟

- مش عارف.. تفرق؟

-مش أوي .. أصل الإحساس الأولاني 'مش قادر' لو مش اتعالج، هيوصل للتاني

'مش عايز'.

- ازاي؟

- مثلا :

أوقات بتحس إن جواك ملخبط أوي - من غير أي سبب ملموس - لدرجة بتوجع وتخنق، بيبقى نفسك تشكي أو تعيط يمكن ترتاح بس مش بتعرف، مش بتقدر تتكلم ولا تنزل ولا دمعة. ولأنك محتاج أوي تعيط بتدور على وسائل مساعدة، يعني ممكن تسمع موسيقى حزينة جدا أو تنفج على مشهد درامي مؤثر فتلاقي دموعك بتزل كثير من غير صوت. كمان ممكن تتجنن وتقعده تتكلم مع نفسك وتنسج حوارات وتنخيل أحداث كثيرة وتشرك معاك أشخاص وهميين/ حقيقيين لحد ما عقلك وقلبك يتعبوا وتروح في النوم.

في الفترة دي بتكون مش قادر تدي.. بتبقى محتاج أوي تتحرر من أي مسؤولية، تفك كل الأحبال اللي رباطك بأي حد.. روحك محتاجة تتحرر من أي عواطف أو واجبات تجاههم، محتاج تبطل تفكير في كل الحاجات اللي نفسك تعيشها و الحاجات اللي عشتها وإذا كانت صح أو غلط ، و الكلام اللي قولته واللي مش عرفت تعبر عنه، والأحاسيس اللي مش اديتها وإذا كان فيه حد كان محتاجها وهتفرق معاه وإنه مش أخذت بالك منه ، محتاج تبطل تحس بالذنب أو الندم.. تتجرد من كل حاجة بتخنقك وتقلقك وتوجعك وتخليك حاسس إنك مقصر، محتاج تبطل تفكر بـ عمق، ويمكن كمان محتاج الأدوار تتبدل شوية.. محتاج تاخذ شوية، محتاج تحس إن فيه حد بيحبك، بيهتم بيك ويخلي باله منك من غير أي مقابل.. محتاج حد يشترك يقينك -اللي بدأ يتهز- بمعاني كثير جواك .. محتاج حد يأكدك إن الحياة مش وحشة أوي وإن لسه فيها ناس وحاجات تستاهل منك محاولات كثير.. حتى ولو بأنه يحكيك حدوده مش لأنك طفل.. لأنك محتاج أوي حد يفصلك شوية عن الواقع.. يساعدك إنك تغمض عقلك وتروح لـ عالم هادي وراقي من غير ما يسألك ويعمل معاك تحقيق مالك ومضايق ليه وزعلان من إيه... وفي الآخر معلى كلنا زيك تعبانين أو ينصحك نصيحة منطقية بس مش محسوسة .. محتاج ماترجعش غير لما تبقى قادر تواجه الواقع بكل ما

فيه من غير ما تتكسر .

المصيبة بقى بتحصل لما كل احتياجاتك دي بتتقابل بالتطيش ولا كأن حد سمعك وإنت بتقول أنا تعبان ومش هينفع أسمع حد ولا أسند حد ولا أططب ولا أريح ولا أفرح .. مش قادر دلوقت .. ولما بيتأكد إحساس التطيش جواك كذا مرة .. بتلاقي معاني كتير جواك اتلخبطت .. وأولهم معنى " العطاء " ، إنت كنت مؤمن إن اللي بتديه بتربح أضعافه واللي بتزرعه بتحصده .. يبقى ازاي جواك فاضي أوي كده، ازاي مبقتش لاقى حاجة تديها حتى لنفسك، ازاي مش لاقى حد تتسند عليه زي ما كنت مُتكاً لناس كتير ، ازاي مش لاقى محبتهم تنفسها وقت خنقتك وكلماتهم الطيبة الصادقة تططب عليك وقت وجعك، ازاي مش لاقى حد يساعدك عشان تلاقي نفسك التايهة، ازاي ازاي !

التفكير في إجابات و فين الغلط بالظبط وازاي تصلحه بيزيد تعبك، بيخليك منهك أوي لدرجة إنك بتسيب كل الأبواب مفتوحة للي عايز يمشي مش بتبقى قادر تقوله استنى شوية لما أتحسن . ولو حاولت تتكلم بتفشل .. مش بيبقى عندك كلام تقوله لأن كل اللي هتقوله هيبان مهزوز .. يقينك بيه مش كفايه عشان توصله لغيرك .. حتى الأبواب المواربة في حياتك بتقفله .. مبقاش عندك رغبة أو قدرة في إنك تتعلق بحاجة أو تتشعلق في رقبة حد . كل حاجة في عينك صغيرة أوي وملهاش أي قيمة ، جواك بيتغير بسرعة كبيرة بتصدمك إنت أكثر من أي حد . بتتصدم من استعدادك الفظيع إنك تخسر أي حاجة/ أي حد بيضغط عليك نفسياً، من إنك اتجرات وأخذت الخطوة الأولى وحررت إيدك اللي حاضنة إيده .. فـ تبدأ تلوم نفسك، على الرغم من إن إيدك مكانتش مرتاحة أوي في العناق ده – كانت متلجة ومزرقه ومحدش مهتم بيها – بس بتحس بالندم إنك إنت اللي أخذت الخطوة الأولى وانسحبت، بتلوم نفسك لأنها تعبت، بتكره إيدك لأنها مش قدرت تصمد في عناق أخذ منها كتير ونسي يديها شوية

دفا.. في نفس الوقت اللي إنت حاسس فيه بالذنب بتتصدم بـ لوم الآخرين
ليك، بنسيانهم لكل حاجة حلوة ليك معاهم ويفتكروا بس اللحظة اللي تعبت فيها
وقولت مش قادر ، بأهم استكثروا عليك إنك تكون إنسان محتاج تضعف ، تعيط ،
تشكي ، ... بأهم عملوا إسقاط لأي عيوب أو تعقيدات في علاقتكم عليك إنت
وحدك وكأنهم ملايكة وإنت الشيطان.. وقتها بتلاقي الإجابات اللي كنت بتدور
عليها ..

بتكتشف إهم قبلوا الدور اللي بتقوم بيه كـ حقيقة مسلمة مينفعش تتناقش أو تتهاون
فيها.. مينفعش تضعف وتحتاج تشحن شوية وترجع تقوم بدورك تاني.
سجنوك ضمن مفاهيم وانطباعات مسلم بيها.. إنت نفسك مكنتش بتتجرأ تناقشها مع
نفسك، كان جواك عياط كثير منعته لحد مبقتش بتعرف تزل ولا دمعة لما تكون محتاج
لده، جواك كلام كثير حبسته لحد ما بقيت ساكت على طول ، حاجات كثير كانت
مصرة توجعك وإنت ولا هنا.. كنت محتاج تضعف وتبكي وتشكي وتتهار بس
مينفعش لأنك دايم الشخص العاقل الكبير المتزن المسئول اللي بيшил كثير ومش
بيقول آه.. الكل حطك في قالب معين وأجبروك إنك مش تخرج منه أبدا.. فـ بقيت
أشبهه بالاسفنجة لازم تمتص تمتص من غير ما تقف تفضي وترتاح شوية أو زي الشريط
اللي بيسجل جواه أوجاع كثير ومش مسموحله يسف أبدا.

لما بتوصل لده، بتصعب عليك نفسك أوي ، بتقول " يااااااااااا هي دي نظرتكم ليا ؟!
.. أنا اسفنجة ! .. أنا شريط ! .. يعني أنا مش إنسان زيكم .. مش من حقي يكون ليا
احتياجات .. مش حقي أضعف وأعيط وأشكي وأحتاجكم تكونوا جنبي ! خسارة
إنساني وصدقي معاكم !"

وقتها - بالتدريج - بتعود نفسك ماتبقاش أوفر أوي في أي حاجة حلوة.. بتبطل

تتصرف بمثالية وإنسانية.. بتقولها كفاية لحد كده.. كل واحد بيحجي يشيلك همّه
ويحكيلك وجعه ويمشي ويسيب وجعه عالق ومعلم جواك.. مش عشان وجعه كان مميز
ومؤثر أوي .. لأ بالعكس الوجع بقى شبه بعضه ممل ومكرر بطريقة مبتذلة.. وبردو
مش عشان كان شخص سيئ وقريب أوي ليك.. بالعكس لو كان كده كان حس
بيك كان حس إنك منهك وكان التمسلك أعذار كثير .. إنك تتوجع بـ وجعه
مالوش علاقه بيه، ليه علاقة بيك إنت، بـ أد إيه إنت كنت معاه أوي بكل حواسك
لدرجة إنك اتملت بيه وبكل تفاصيله وأوجاعه، بـ أد إيه إنت كنت صادق ومتفاني
أوي في وقفك وعمقك معاه.. وفي الآخر لامك.. طلعت إنت الوحش.. وكل لما
اللوم بيزيد.. مش بترد أو بتشرح.. لأ إحساسك بـ اللامبالاة بيزيد ويقتل جواك
وفاءك لـ أيّ معاني، و بتفقد خالص يقينك بفايدتها، واستعدادك لخسارة أيّ حد مهما
كان قربه بيزيد، مش بتفوت لأيّ حد يدوسلك على طرف، مبقاش ينفع تعدّي حاجة
كنت بتعدّيها زمان حتى ولو بمزاجك، ما بقاش يمشي معاك تمشية الحال وكبر دماغك
وعديها .. إما كل حاجة حواليك ومعاك وليك تحصل صح أوي أو بلاش، إما الأدوار
تتأدى زي ما هي لازم تكون أو ملهاش لازمة. عشان كده قدرتك على العتاب أو
التقاش أو المحاولة من جديد بتتعدم، ما بتبقاش قادر تسمع كلمة "معلش" لا من غيرك
ليك ولا حتى منك لنفسك، مبقاش يرضيك أنصاف الحلول (النص فرحة ، النص
اهتمام ، النص مشاعر ،) وبقي يستفزك أوي اللون الرمادي .
جملة واحدة بقت تتردد جواك دائما "إنتوا اللي اخترتوا تشوفوا الوش الثاني .. فـ
استحملوا بقى " !

..

عاندت قدام ضعفك ووجعك، كنت قدام عينك "جواك" بـ يعطب وتعمل نفسك
مش شوفت، العند والتطيش وصلك لـ نقطة اتكسرت ووقعت ولما ملقتش حد

جنبك يسندك فقدت إيمانك بكل حاجة كنت بتعملها وتحولت لـ نقيض كل اللي
كنت بتمثله أو بتحاول تمثله .. بقيت مش عايز !

- وإيه ممكن يرجع للإنسان ده يقينه المفقود تاني ؟ فيه حل يخليه يرجع تاني يحس بالمتعة
والفرحة وهو بـ يدي فـ يبقى عايز وقادر يدي أكثر وأكثر وأكثر . . . من غير
حدود أو مقابل ؟ إيه ممكن يرجعه ليه تاني ؟

*العنوان " طرح دبلان " من أغنية إليسا "جربت".

(١٢)

مشاعر مشروطة

العطاء / الحب المشروط - أتحبني .. لـ تحب .. لـ أحبك .. وإن لم يحدث،
إن لم أحبك .. تكرهني! - ليس عطاء/ حبا حقيقيا !

- بتفكري في إيه؟

- تفتكر إحنا لازم نحب وندي بس اللي يحبنا/يديننا في المقابل؟

- أو مال هيبقى فائدة حينا/مشاعرنا إيه لو هو كمان مش هيجبنا؟!

- ملهاش أى فائدة؟!

- ملهاش!

- فاكر وإحنا صغيرين، لما كنا بنحب أوي الحاجات النونو (كتكوت، قطة، كلب،

عصفورة...) سواء كانت مخلوقات حية أو لعب، ونقضي أغلب يومنا معاهم ..

نأكلهم، ونشربهم، ونهتم بيهم وكأنهم عيالنا، لدرجة إننا ممكن مناكلش ولا ننام، مع

إن لعبة زي العروسة لما نلبسها ونسرحلها شعرها ونأكلها مش بتدي أي رد فعل، مش

بتتكلم وتقولنا شكرا أو حتى بتقدر تردلنا حينا واهتمامنا بيها، وحتى الحيوانات الأليفة

أوقات بتكون مزعجة بس بردو مكناش بنوقف حينا أو اهتمامنا بيها ولا كمان كان

إزعاجها بيقفل درجة حبنا ليها ، كنا بنمارس معاها نفس دور أمهاتنا وآبائنا : حب وعطاء من غير قيود أو شروط.

ليه ده بيتغير لما بنكبر؟ ليه المشاعر بتبقى مشروطة بـ مقابل وتوقعات؟! مع إن معنى كلمة بحبك -اللي بننطقها- إننا مؤهلين وقادرين على الحب والعطاء، معناها إننا اخترنا بكامل إرادتنا ووعينا إننا فهمنا ونراعي ونندي ونتفاني من غير شروط أو مقابل، إننا قررنا عن طيب خاطر إن يبقى جزء من وقتنا واهتمامنا وإحساسنا وتفكيرنا لإنسان تاني ، من غير شروط مسبقة... معناها إنه ماينفعش تقولي بحبك أو أنا ههتم بيك وأراعيك وأمنحك حي بشرط إنك بالمقابل تحبيني أو تتصرفي بالطريقة اللي تعجبني أو تهتم بي زي ما تهتم بيك أو إن كل شوية تمنني إنك بتضيع وقتك في رعايتي.

بجيك معناها إنك — لما تحس من جواك بجنان وحب واهتمام ناحية أيّ حد /لما تحس
إنك قادر تدي ، إنك قادر تطلع جزء من كل حاجة جواك لـ
شخص/هدف/حلم/حيوان/نبات.... هتمسك أوي في اللحظة دي والإحساس ده
ومش هتمنع نفسك عنه، مش هتسد النبع اللي اتفتح وفاض بـ شروط أو توقعات،
بالعكس هتسيبه يروي تربة قلبك وروحك ويفيض على اللي حسيت ناحيته بالحب،
وهتحاول بكل ما فيك إنك تزيل أيّ شوائب - توقعات ، مقابل ، شروط- من نبع
الإحساس ده، ولو إنت صادق في حبك ومحاولاتك، هتنجح .. لأنك هتكون مُدرك
إن الـ " شخص/هدف /حلم /حيوان/نبات " ده هو السبب الأساسي - بعد ربنا -
في قدرتك على الإحساس بالحب .. هو اللي صحى جواك رغبتك في العطاء .. هو
اللي إنت اخترت بإرادتك ووعيك إنك تستودع عنده إحساسك وإنت راضي و
مبسوط جدا.

...

ماينفعش نرجع صغيرين، ولما نحب حد مايقاش عشان نتحب/محتاجين نتحب؟!
ماينفعش نرجع صغيرين، ولما نحب حد يكون حبنا ليه من غير
قيود/مقابل/شروط/توقعات مسبقة؟!

(١٣)

وجعي مش بيوجعك

كم هو مؤسف أننا نترك الأشخاص الذين نُحِبُّهم يُدمروننا على أمل أن يحبونا

يوما ما !

- مفتقد وجودك أوي

-

- أنا عارف إنك زعلانة مني

- لا اطمئن مابقتش بزعل من حد

- بطلي رخامة بقى إنت عارفة إن وجودك مهم جدا في حياتي

- أه عارفة .. بس مش بمزاجي .. إيدي وجعتني

- مش فاهم .. قصدك إيه؟

- لما الإنسان بيحب حد أوي .. يبقى مش عايز أبدا يزعل منه أو يخسره .. كلمة "

الخشارة " مش بيسمح إنما تدور في دماغه أبدا .. دائما بتبقى خارج اختياراته... ف لما

يتوجع منه.. مش بيقول " آه " .. مش بيحسسه إنه تسبب في وجعه.. بيستنى منه إنه

يخس لوحده.. ولما مش بيحصل ولما بيوجعه تاني بيقول لـ نفسه "معلش يمكن مش

واخد باله، أشاورله أنا على المكان اللي وجعتني فيه عشان يخلي باله ومايدوسش عليه

تاني" ولما بيدوس ويوجعك لـ تالت مرة برضو مابتقاش عايز تخسره، بس إنت موجوع وهو عادي .. إنت أصلا مش في باله! وبتتعد تفكر ليه هو مش بيهتم/مش حاسس بأنه بيوجعك؟! .. وبتلاقي نفسك بتدور في دوامة من الأفكار والاحتمالات وعشان تخرج منها لازم تعاتبه، ف بتتفاجأ بـ مبررات غير منطقية بتوجعك أكثر من سبب الوجع الأساسي ، لأنك ماكتتش محتاج منه إنه يستخف بـ عقلك ومشاعرك و يرهق نفسه في البحث عن مبررات عشان تسامحه، إنت أصلا اتعودت تقوم بالدور ده عنه.. وبقيت بتدافع عنه أحسن ما هو بيدافع عن نفسه... بس كنت محتاج تحس إنه زعلان وندمان من جواه إنه وجعك.. وإنه يجد هيحاول على قد ما يقدر إنه يخلي باله ومايوجعكش تاني. وعلى الرغم من إحساس الخيبة والغضب والوجع اللي جواك منه وعلى الرغم من رفضك لـ فكرة التنازل ليه تاني بس إنت لسه حريص على عدم خسارته ف بتحاول تقنع نفسك إنك هتقبله كده وبتدور على أي حاجة حلوة - ولو صغيرة أوي - فيه تشفعله بيها عند نفسك وفي نفس الوقت تلهيها فـ ماتغضبش عليه لما يرجع يدوس ويوجعها تاني ... بس - مع الأسف - مع الوقت خطتك بتبوظ، نفسك هترمي الـ " لهاية " لما تلاقيك بطلت تعاتب/ ترعل وتغضب/ تدور على مشاعر أسف وندم .. بطلت تحس بوجعها وساييه يدوس براحتة فيها، والطبيعي عشان تسامحك لازم تظهرها مشاعر أسف/ندم صادقة وتبدأ تشوف حل لـ إحساسك اللي اتبلد ناحيتها، بس إنت مابتعملش كده .. بتعمل اللي هي مش محتاجاه ولا كانت متوقعاها منك أبدا، بتألفها مبررات غير منطقية أو -الأسوأ- بتطنشها وترجع تتعامل معاها عادي ولا كأنك وجعتها، وبتستغرب لما بتقع وتقولك خلاص تعبت وبتسألها: " ليه مش إنت اللي رضيت بـ الـ ' لهاية ' من البداية؟! "

فـ عشان كده هتلاقي نفسك بعد كده في أي علاقة من البداية حازم/صارم .. يعني " اللي وجعك لو محسش يبقى مالوش لازمة تعاتبه / واللي عاتبته ومفيش فايده فيه

يبقى مالوش لازمة تقوله خلي بالك / واللي غالبا مش بيراعيك ولا بيقدر ظروفك
تشرحه وتبررله ليه / واللي شرحته نفسك كذا مرة ولسه جاهل بيك تكررله ليه!!"
هتلاقيك أخذت قرار إنك: ماتناقش، ماتعاتبش، ماتشرحش، ماتبررش، ماتكررش أيّ
حاجة لـ أيّ حد مُصرّ إن أخطأه في حقك تبقى كتيرة/كبيرة لدرجة إنها هتتجاوز
حدود مغفرتك.

– بس إحنا بشر بنغلط وحلو إننا نعذر ونسامح بعض.

– أه أكيد .. بس أنا بقيت أحب أكون متوازنة، يعني حلو إن الإنسان يقلل عتاب
ويتلمس الأعذار للآخرين بس مش حلو إنه يتمادى فيه لدرجة تدخله في دوامة فكرية
وشعورية من الاحتمالات، التوازن حلو . اعذر بس ماتضغطش على نفسك وتيجي
عليها ... لأنك لما بتكون وحدك حريص على استمرار علاقة مهمة في حياتك، مع
الوقت إيدك اللي متمسكة أوي بالعلاقة دي بتوجعك أوي ، و بالتدريج من غير ما
إنت تحس بتخفف من تشبثها ده .. وفجأة بتلاقيها سابتها خالص وإن كنت إنت مش
حبيب أو مكنتش متوقع النتيجة دي ، بس خلاص إيدك اتحررت وحطنتك قدام الأمر
الواقع ولو عملت إيه مش هتقدر تقنعها إنها تمسك أوي في أيّ علاقة تاني .. إنت اللي
هتقبل بالأمر الواقع مع الوقت ، هتقبل إن العلاقة دي تنهار قدام عينيك على الرغم
إنك تنازلت كتير عشان ترمها وتقويها.

– الاعتذار ممكن بينها من أول جديد.

– فيه فرق كبير بين إنك تعتذر وإنك عارف ومعترف بحجم خطئك بالظبط في حق
غيرك وحاسس أوي بتأثيره عليهم وكمات متقبل لأيّ رد فعل منهم، وبين إنك تعتذر
وإنك بتقلل من حجم وتأثير خطئك كتير أوي بأنك مش تسميه بإسمه الحقيقي وفي
نفس الوقت تختلق لنفسك أعذار وتتوقع إن لازم غيرك يتقبلوها ويعذروك وينسوا
بسرعة سوء تصرفك معاهم . أكيد إنت محتاج الطرف التاني يديك فرصة تحاول تمسح

من جواه أيّ مشاعر سلبية رسبتها جواه .. بس لازم يكون عندك صبر ، لأن غالبا مشاعر -الأسف/الندم/الاهتمام - لما بيتيجي متأخرة بتفقد تأثيرها، متأخرة بـ معنى إنه هيتقبلها .. بس مش هيحسها، مش هتلمس أوي جواه، مش هتأثر فيه لدرجة إنه بسرعة ينسى أيّ حاجة وجعته ويبدأ معاك صفحة جديدة مفيهاش ولا نقطة سودا. لما بيسمعا في غير الوقت اللي بيكون محتاجها فيه، بيقول جوا نفسه " ياااا ده أنا استيتك كثير أوي عشان تقولها ! " أه الاعتذار حلو .. بس الأحلى إنك لما تحس نفسك غلطان أوي في حق حد .. ولما تحس إنه زعلان منك وبيهرق نفسه وهو عمال يلتمسلك أعذار بيعتذر بيها لـ نفسه بدالك .. ولما تحس إنه استحملك كثير وخلاص مش هيقدر يتحمل أكثر، ماتستخسرش فيه كلمة تقولها بـ صدق وندم - آسف - ، ماتقولوش أنا عارف إنك زعلان وتسكت ، ومتقولوش ماتزعلش عشان كذا وكذا. إياك تقوله مبررات -غير منطقية- تستخف بيها من عقله أو تحاول تستخف بمشاعره بأنك ترجع تتعامل معاه ولا كأنك وجعته، ماتخلهوش يضطر يتخلى عنك .. لأنه هيزعل من نفسه أكثر مازعل منك.

(١٤)

عزلة مشروعة

بعض الزهور تبدو في عالمها الخاص رقيقة ساحرة.. إلا أنّها في بعض الأحيان تكون
سامة وقاتلة لمن يحاول لمسها أو حتى خدش سكون عالمها.. فأحذر أن تقترب كثيرا !

- مش هتبطلي تبقى عدوانيّة؟
- وأبطلّ ليه؟!
- عشان إنتِ بنتِ والبنتِ المفروض تكون رقيقة.
- المفروض! مع إني بكره الكلمة دي جدا .. بس قولّي مين يستاهل أكون معاه
رقيقة؟
- ماحدث؟!
- بص، الاحكتكالك بالناس/بالحياة بيخيّب آمالك ويفقدك مع الوقت معاني
إيجابية/إنسانية ويرسّب جواك معاني سلبية/عدائية ... إنتِ ماتبقاش واخذ بالك أو
مدرك أوي للي بيحصل جواك .. فجأة بتلاقي نفسك فاضي من أيّ جمال و بتجيب
آخرك من أيّ سبب بسيط مكانش ممكن يآثر فيك زمان.. ومايبقاش عندك طاقة لـ
أيّ حد .. ولو عندك بتحس إنك مش عايز تديها لحد .. ماحدث يستاهل وبقيت
تكره مشاعرك اللي بتخليك تيجي على نفسك وتحمّلها فوق طاقتها عشان بس

تشوف السعادة في عيون غيرك .. وكأنك خرجت برا جسمك وبقيت حد تاني... فـ
بتحس إنك لازم تبعد شوية .. مهما كانت الأسباب -بسيطة أو معقدة - اللي
وصلتك إنك حاسس إن ما حدش يستاهل .. بتدخل قوقعتك وتقفل كل الأبواب
كويس عشان محدش يقدر يوصلك .. لأنك بتكون واصل لـ مرحلة إنك مدمر نفسيا
لدرجة إنك ممكن تدمر غيرك لا إراديا .. فـ بتتحمل إنك تكون وحيد ، بردان و
موجوع أوي لأنك مش هتتحمل فكرة إنك تأذي غيرك إنت جوا قوقعتك
بتحاول تستعيد نفسك بتاعت زمان بطريقة حنية ولطيفة وجميلة.. لأنها بتكون
محتاجة أوي أي حاجة تحصل تطمئنها /تأكدنها إن المشاكل والناس برا مش سيئين أوي
كده /إن لسه فيه مشاعر طيبة جواها -مش خلصت زي ما هي معتقدة- / وإن الدنيا
لسه فيها حد يستاهل الجمال - طيبتك، رقتك، حنيتك ، - اللي جواك.
يبقى ليه غيرك بيلح عليك تخرج .. ليه بيلومك لما تنعزل شوية .. وليه يرهقوك بأسئلة
ملهاش إجابات؟! ، أكيد "هو/هي" بيحبك / خايف عليك / مهتم بيك/ قلقان
عليك بس مش قدر يريحك/ يطمئنك .. مش قدر يحول كل الضلمة جواك لـ
نور .. وجوده مش منعك إنك تدخل قوقعتك .. وإنت قدرت تفهم وتتقبل ده لما
عرفت إنه خارج حدود نفسه / إدراكه / مشاعره .. يبقى ليه هو/هي مش قادرين
يتقبلوا إنك بفترة العزلة دي بتحاول تعمل أفضل ما يمكن فعله عشانك وعشانه!؟

(١٥)

التورط الانفعالي

*وجعك بيوجعني:

لا أعلم لِمَ أجدني مختلفة معك؟! لِمَ أكون أكثر حنانا وعطاءً وصبراً؟!... رُبّما بسبب تلك النظرة التي أراها بـ عينيك .. نظرتك الطفولية اليتيمة المستجدة بي تُثير أمومي ورجبتي العميقة في البذل والعطاء فـ أودّ لو أحتضنك، لو أشبعك أمنا وأمانا، لو أجدُ طريق الهروب من تلك المناهة - مناهة الألم - وأخرجك منها سالماً مُعافى.

فاكر زمان لما كنت بتتابع مسلسل وحلقة والثانية .. تلاقي نفسك متأثر أوي بأحداثه ومشغول أوي بأبطاله .. وتبقى مستني تعرف إيه اللي هيحصلهم .. فـ تفرح أوي لفرحهم .. وتحزن أوي لو حصلهم حاجة وحشة .. وتلاقي دموعك بتترل لو البطل أو البطلة ماتوا ... فـ تلاقي أخوك الرخم يخرجك من المود الكئيب بأنه يقولك " إيه يا ابني ده تمثيل مش مات حقيقي " فـ تمسح دموعك وتفوّق نفسك الموجهة بأنه يجد كل ده تمثيل. بس المشكلة لما بيكون حقيقي مش بتلاقي حد يخرجك من المود الكئيب، ومش بتعرف تفوّق نفسك، لأنها فايقة جدا، عندها وعي حاد وإحساس عالي بيتماسوا مع وجع وبؤس الآخرين ويعملوا جوار روحك فجوة بتقع جواها كثير وإنّ بتحاول تسدها، وإنّ بتحاول تلاقي طريقة ، كلمة ، إحساس ، أو حتى نظرة تخفف

بيها إحساس الوجد جواهم وجواك .. وعجزك عن تخفيفه بيكبر الفجوة اللي جواك
ومهما حاولت مش بتعرف تخرج منها.. بتبقى عاملة زي المتاهة، بس مش متاهتك
إنت.. متاهة آلام ومشاعر الآخرين.. فـ بيبقى صعب عليك تخرج منها من غيرهم..
بتحس إن كل هم/ وجع/ حزن أيّ حد في الدنيا مسؤوليتك إنت .. أيّ حد موجوع
أو خايف بتبقى نفسك تحضنه حضن طويل يسحب كل الوجد اللي جواه .. وكأن
كل الموجوعين أطفالك.. طفلك اللي لو سخن وعيان بتفضل سهران جنبه طول الليل
تعمله كمادات وممكن تحط دماغه تحت الميه الساقعة وتتحمل صرخته وممكن تدعي
"ياريت اللي فيك يجي فيا" بس عشان يبقى كويس.

*اسقاط:

لا تحاول أن تُحدّثني بتلك الطريقة التي تُظهرك بدور الضحية لـ جريمة لم ارتكبتها
وذنب لم أقترفه.. مازلتُ قادرة على تمييز الخطأ من الصواب في كل ما أفعله.. فكُفّ
عن تصرفاتك الطفولية التزقة.. الآن لن تُجدي نفعاً معي.

متهيألي أسوأ أربع صفات ممكن يتّصف بيهم أيّ إنسان هما " الغدر ، المزاجية أو
التقلب في مشاعره ، الشح في المشاعر ، الإصرار على عدم التّضحج " وصعب جدا إن
فيه حد يقدر يتكَيّف مع الصفات دي من غير ما يكون مكروه على كده .. أو عاجبه
أوي إنه يعيش دور المنقذ/الضحية .. أكيد حلو أوي إنك تساعد إنسان على إنه يصلح
عيوب في شخصيته أو في حياته .. بس خلي بالك لبدل ما إنت تصلحه هو يفسدك

ويوظلك حياتك.. أصل إحساس الاحتياج عامل زي المغناطيس بيشد أوي.. فـ
مبتقدرش تعمل كنترول على مشاعرك .. متقدرش تخلي شوية تباعد انفعالي بينك وبين
أي حد فـ بتلاقي نفسك متورط عاطفيا .. فلو اتوجع هتحس بوجعه وكأنه وجعك
.. هتلاقي نفسك طول الليل مش عارف تنام مش لأنك بتفكر في نفسك لا، لأنك
بتفكر ازاي تساعده وتحل له مشاكله .. هتلاقي نفسك بتراجع كل كلمة قبل ما
تنطقها أو تكتبها ليه لـ توجهه .. هتلاقي نفسك بتبقى عايز تروح ترعق أو تضرب
أي حد زعله وبعدين ترجعه وتاخده في حضنك لحد ما تظمن إنه بقي كويس ...
هتلاقي نفسك بتتغاضى كثير عن تصرفاته الطفولية وقلة اهتمامه وجرحه ليك... لأنه
بيصحى جواك مشاعر المسئولية / الأمومة / الأبوة/ وأحيانا الشفقة..... وهتقدمه
المشاعر دي بتفاني جدا في سبيل إنه يتغير ويكبر ... وتستنى وتبصير لحد ما يجيب
آخرك ويفوقك على حقيقة إنك أفنيت نفسك عشان يكبر وهو مُصر يفضل صغير ..
لسه زيّ ما هو طفل متطلب مزاجي غير قنوع غدار .. في لحظة يبقى ظريف
ولطيف ويقعد يشكر فيك وفي صفاتك الملائكية .. وفي اللحظة اللي بعدها على طول
لما مش تحقّله طلب أو توقع يتقمص زي الأطفال ويتحول كل كلامه عنك ١٨٠
درجة ويبدأ في إسقاط كل عيوبه عليك ويحاول بكل طاقته يرسخ جواك إحساس
بالذنب ناحيته ولأنك مربوط بيه بإحساسك بالمسئولية تجاهه فمرة والثانية هتصالح
وتحايل .. والمرة الثالثة هتقرر إنه لازم يفهم غلطه بنفسه ولما تيجى تمشي هيحاول
يستبقيك بأنه يخليك تشفق عليه وتتعاطف معاه .. فمبتقدرش تمشي وتسيبه.. وميقاش
قدامك غير إنك تستحمله وتحايل وتطبّب تاني ولأنك استنفدت كل الطرق معاه
وعشان تتجنب الصدام بينك وبينه بتخضع لـ طلباته وتوقعاته.. فـ تخالف نفسك ..
ومرة ثانية تعامله بنفس معاملته.. تنسخ عيوبه وتحطها فيك.. و من غير ما تحس بتلاقي
جواك بيتغيّر.. عيوبه ومشاعرك تجاهه تمكّنت منك لحد ما بقيت نسخة مشوّه منه..

ومتبقاش عارف امتي بقيت نسخة مشوّهة من شخص متحش تكون شبهه في أيّ شيء .. شخص كنت بتحاول تساعد يتغيّر فـ غيرك هو لدرجة مبقتش عارف نفسك.

*حرّر نفسك:

إن فكرت أن تُرهقني بأيّ تصرف أحمق، ستجد يدي الممسكة بك بقوة قد تحرّرت بسرعة جدا ودون أيّ ذرّة ندم.. فـ احترس، أو لـ تتحمّل قسوتي كما أعجبك
حناني!

متهيألي كل واحد عارف قدرته على تحمل أيّ حاجة.. عارف امتي يحاول وامتّي يجادل وامتّي يحارب وامتّي يقف وامتّي ينسحب.. يبقى ماتجيش على نفسك أوي وتتعبها حد ماتوصلها لمرحلة "جبت آخري" .. المفروض إنك متوصلهاش لكده عشان لو وقعت منك - نفسك - من كتر الضغط عليها هيبقى صعب عليك أوي تقدر تقنعها تقوم تقف تاني لأنها عارفة إنك مش رحيم عليها وهترجع تحمل أثقال فوقها تاني ، أكيد فيه ناس كثير تستاهل إنك تديها أكثر من فرصة بس مش لدرجة إنك تفنى نفسك. فـ لما تحس إنه عاجبك أوي إنه ليك دور وقيمة في حياة حد لدرجة إنه بيرجعلك ويستشيرك في أصغر تفاصيل حياته .. وإنك بدأت تحس بشوية غرور إنه جالك واختارك إنت ووثق فيك من دون كل الناس وحط قدامك وبين أيديك كل معاصيه وعيوبه وأخطاؤه.. وبعد شوية بدأ يترسخ جواك إحساس بالعظمة لأنك الوحيد اللي شاهد على كل تحبّطاته والوحيد اللي قادر توجهه .. وفرحان أوي إنه معاك بقى زيّ

العروسة اللي إنت ماسك خيوطها في إيدك وبتحركها على كيفك .. فـ كل اللي
 هتقولو هيبقى مقدّس أو حقيقة مطلقة مينفعش يشكك فيها .. لما بتحس بكل ده أو لما
 تحس بأنك بدأت تتورط عاطفيا ومش عارف تتحكم في مشاعرك .. سيبه وامشي ..
 حرر إيدك واجري وأوعى تبص وراك .. لأنك في الحالتين خسران نفسك .. أما
 هيكبر جواك إحساس إنك محصلتش ويعمل منك فرعون .. أو إنه هيخليك مهووس
 بإنقاده ويستنزفك عاطفيا .. ولو مشاعرك حاولت توقفك في نص الطريق وتخليك
 ترجع، طبطب عليها وقولها إنك مش هتقدر تكون ماما أو بابا لـ شخص مش ناوي
 يكبر / رافض إنه يبقى أحسن .. فهّمها براحة " إن الله لا يُكلف نفسا إلا وسعها " ..
 فكّرهما بـ رحمة ربنا في قوله " وأما الغلام فكان أبواه مؤمنين فخشينا أن يرهقهما
 طغيانا وكفرا " .. وإنه مش كل الناس ربنا بيكون مديهم طاقة نفسية وقدرة على
 التحكم تخليهم مايتغيّروش أو يفقدوا صفاتهم الحلوة إن تواجدوا في مكان سيء أو
 اتعاملوا مع أشخاص مش كويسين ... نهها إنها لو فضلت مشدودة ومربوطة بـ
 احتياجه ليها هتفقد طاقة ممكن تفيد بيها ناس كثير محتاجينها بجد.. وهتوصل في يوم إنها
 هتبقى مفلسة من أيّ مشاعر وكلمات مُبهجة.. حاول معاها لحد ما تحررها وابعدها
 وفي نفس الوقت خليها على الصامت.. عشان ماتتصدمش.. خلي أوبشن اللايك
 والديسلايك والكومنت غير مفعلين.. يعني اللي عايز يعاتب كبر دماغك منه .. و
 اللي مُصرّ يصغر نفسه وحابب ينسى أيّ حاجة كويسة ليك معاه ويبدأ يديك أوصاف
 وحشة ويخليك أقرب ما يكون للشيطان .. تجاهله وامشي في طريقك .. أوعى ترد
 عليه أو تبرر لأنه مهما قولت مش هيفهم مش هيحس .. فـ متحملش نفسك فوق
 طاقتها سواء بأنك تتحمل حد رافض إنه يبقى أحسن، أو بالنقاش والتبرير لـ حد
 رافض إنه يديك حق إنك إنسان وليك طاقة تحمّل!

(١٦)

الروح شباك العين

لم تتأمل قط عيناى فترى الحزن يسكن بهما.. فـ لم عليّ خفضهما حين أحدثك؟

— أنا ما بقتش عارف أفهمك.. اللي يشوف إحساسك بكل تفاصيل

الأنوثة/الرقّة/الرومانسية .. ما يعرفكيش دلوقت وانت بتكلمي بـ عدوانية/قسوة.

— إنت عايز ايه دلوقت؟

— عايزك تبقي حلوة دائما.

....

عارف، أنا كنت زمان مش بحب أتصور.. كنت بحس إن الصور كذابة.. كنت بحب أشوف نفسي أكثر في المراية.. بحسها مش بتكذب عليّ زي الصور.. مش بتظهرني فرحانة وأنا جوايا موجهع وييعيط... بس دلوقت من كتر ما جوايا اتغير ما بقتش بقدر أبص في المراية.. بخاف أشوف الخوف، الوجد، الشحوب، الحزن، الحيرة،

بخاف توحشني ابتسامتي، لمعة عيوني، الشقاوة اللي في ملامحي .. فـ بقيت بتصور كثير وأنا بضحك .. ولما كنت بتفرج عليها كنت بفرح أوي في وقتها بس بعد كده مش بقدر أبص فيها وما كنتش بفكر ليه؟ مش هو ده اللي أنا عايزاه؟ أخلّد تفاصيلي الحلوة في صور؟! وكنت بهرب من التفكير في الأسئلة دي بأني أتصور صور تانية وتالته

ورابعة.. و ما أخذتش بالي بالتغيير ده - إن بقالي كثير مش بصيت في المراية وإني
 بهرب منها بالصور - غير لما قولتلي "عايزك تبقي حلوة دايمًا"، جريت عليها واتمعتت
 في ملامحي أوي .. يمكن أول حاجة وقع عليها نظري هي "عيني"، فضلت متنحة
 قدامها كثير على الرغم من إني كنت واثقة إن اللمعة اللي بتنورّها انطفت.. بس كنت
 بدور على حاجة تانية، يمكن كنت محتاجة ألاقي أيّ حاجة ولو كان
 حزن/وجع/حب/بقايا حلم/حماس/انبهار... أيّ حاجة، بس مش لقيت، لقيتها فاضية
 أوي، خالية من أيّ تعبير، غرقانة في اللاشيء.. فسألت نفسي يا ترى التغيير ده كان
 سهل ولا صعب؟ حلو ولا وحش؟ وياترى العين هي اللي بتشوف الجمال ولا الروح؟
 مش لقيت إجابات لـ أسئلتني.. والأسئلة بتزيد جوايا.. وجملتك مش عايزة تروح
 من بالي.. كل خلية في جسمي بتردّدها "عايزك تبقي حلوة دايمًا" لحد ما صرخت
 فيهم/فيا: أنا حلوة.. حلوة أوي! ... ف سكتوا كلهم... ووقتها لقيت الإجابات
 :

"العين بتقدر تشوف وتقرأ وتفهم وتستوعب وتستكتشف وتستخلص بس لو إنت
 عايز تشوف الصّح مش الحلو الخادع، الحقيقة من غير تعديل أو رتوش، مش الكذب
 اللي عينك خدت عليه، المعنى والحكمة مش الخواء واللاشيء."

لما قدرت أستوعب كل تفصييلة في الإجابة عرفت إني قفلت شبابيك روعي.. فـ
 الدنيا بقت ضلمة أوي.. ولما ماقدرتش أشوف أيّ نور وجمال.. رocht للصور
 عشان أقدر أشيل منها أي حاجة مش عاجباني و أحط فيها كل حاجة أنا عايزاها...
 يعني بدال التكشيرة اللي بتظهر في المراية.. أرسم ضحكة حلوة في الصورة، وبدال
 الدموع والحزن في العيون.. أخليها منورة بـ لمعة. مقدرتش أفهم إن الجمال هو إن

(١٧)

ليتنا نتفهم بعض ولو قليلا !

أنت ترى أنّ الأمر بسيط .. وأنا أشعر أنّ للصّورة أبعاد أخرى معقّدة لدرجة تفوق حدود إدراكك بكثير.. ولكن لن أطلبك بأن تشعر بالمثل.. وأنت أيضا لا تطلب مني شيئا سوى أن أتفهّمك !

- إنّتِ مش ملاحظة إنك بتدخّلي كل حاجة في بعض وبتعقّدي الأمور زيادة عن اللّزوم!؟

- و إنّتِ مش ملاحظ إنك دائما بتحب تشوف الصورة من بعيد/مش بتدقّق في التفاصيل، وبعدين ترجع تحكم عليها من ناحية واحدة بس وتمل بقية الجوانب والحياة مش كده أبدا!؟

-أومال أبقى أوفر أوي زيك!؟

- تعرف يمكن المشكلة الأساسية إن كل واحد بيخوف ويحس ويتكلم من جوا نفسه .. لحد ما حس إنه جوا المشهد.. ويمكن كمان اتحبس جواه بإرادته .. عشان كده مقتنع أوي إن كل لقطة بيخوفها لو فهمها هو و تقبلها يبقى ينفع الكل يشوفوها

بسيطة ويتقبلوها زيه.. ولو العكس لو شافها معقدة يبقى لازم الكل يشوفوها كده
..... ولو مش حصل كده يبقى الطرف التاني إما مأفورها أوي أو الحياة في عينها
وردي .. وفي الحالتين مش هيكون مستعد إنه يتفهّمه، أوقات كمان الموضوع بيتطور
معاه إنه يبقى حاسس بمتعة إنه هو لوحده اللي فاهم أوي كل حاجة.. بس يمكن لو
خرج بره نفسه وبدأ يشوف كل حاجة من بره هيفقد المتعة دي لأنه هيحترق وهيحس
إن حاجات كثير كانت مفترضة ومش حقيقية.. هيعرف إن لقطات كثير مكانتش
بالجمال والبساطة والمثالية اللي هو كان بيشفهم بيهم إلا لما هو بنفسه بسطهم
وجملهم أوي و حط عليهم من نفسه ومن معاني كثير جواه عشان يلاقي حاجة يفتخر
بيها ويقدسها ويعتبرها منقذه الوحيد .. ولقطات تانية مكانتش بالسواد والتعقيد بس
هو في الوقت ده كانت عنده مشاكل كثير خلته شايفهم كده.

..

متهيألي لو قدرت تخرج وتشوف المشهد من بره نفسك وقتها بس ممكن تقدر تتقبل
وتفهم الشخص المختلف معاك وعنك.

(١٨)

دائر الترحال

ألم تكن أنت من علمتني أن لا أفرّ من المواجهات، أن أصمد في وجه من يحاول انتزاع
أمني وسلامي الداخلي، أن أكون محاربة وعدوانية إذا تطلّب الأمر.. فـ لِمَ الغضب
وأنا لم أرسب في اختباري الأوّل، الذي كان معك؟!

— أخيرا لقيتك، بقالي فترة مش عارف أوصلك.

— أديني ظهرت.

— طب ما كنتيش بتردّي على تلفوناتي ليه؟!

— معلش كنت مشغولة شوية.

— مشغولة عنّي أنا؟! ده إنتِ كنتِ بتسيبي كل الدنيا وراكِ أول لما تشوفي رقمي.

— كنت.

— إنتِ زعلانة منّي عشان بعدت فترة؟ ما إنتِ عارفة إنه كان غضب عني.

- فاكر لما سألتك قبل كده " امتي يكون قراري بالانسحاب من حياة حد مناسب؟"
وكان ردك "لما تحسي إن وجودك في حياته مالوش لازمة أو لما تحسي إن السلام بينك
وبين نفسك بقى مشروط بـ وجوده /اختفائه "

- يعني أنا دلوقتٍ بقيت عائق بينك وبين سلام نفسك؟

- دلوقتٍ لأ ... إنت بعدت أوي جوايا ومابقالكش التأثير ده.

- بعدت!

- لما بيكون حد قريب منك متعود على وجوده في أغلب يومك ويغيب بالتدريج أو
فجأة ، بمبرّر أو لا ، بيبعد جواك -بالتدريج- قد كل لحظة وحشك ومقدرتش تطفي
شوقك بوجوده ، قد كل لحظة كنت محتاجه فيها ومش لاقيته ، قد كل لحظة كنت
قلقان عليه ومعرفتش تظمن نفسك ازاي ، قد كل مرة كانت بتجيلك رسالة أو مكالمة
وتفتكره هو فيطلع حد تاني ، قد كل مرة عاتبته فيها في سرك واستنيت كثير تسمع
كلمة معلش منه وملقتش غير صدى صوتك .. بيبعد جواك على قد كل لحظات غيابه
اللي وجعتك وخذلتك قدام نفسك لما وقفلتها ودافعت عن غيبته ولما بيرجع بتكون
عاهدت روحك إنك ماتعلقهاش /ماتربطهاش تاني بحد ممكن يغيب/يبعد ولو ثانية عنها.

..

جوايا قرّر إنه يبعدك لأن :

روحي تستحق اللي عايز يكون معاها/جنبها/حواليها ، وإن بعد/انشغل/غاب .

روحي تستحق اللي يفتكرها ويحنّ لـ تفاصيلها من أوّل يوم غياب، مش بعد أيام

وأسابيع اتسببوا بـ فجوة جواها بلعت كل التفاصيل اللي كانت بيني وبينك عشان

تتردم.

روحي تستحق اللي حابب أوي يكون جواها، وإنت بتحب الترحال..

(١٩)

كتاب لن يُقرأ

كيف فقدتُ شغفي بك وأنا التي كُنت أحتسيك على مهل خوفا من انتهائك؟!!

— إيه ده؟!!

— شيبسي و بسكوت ومصاصة ولبان وأيس كريم.

— بس أنا قولتلك إن نفسي في شيكولاته.

— ما البسكوت والأيس كريم فيهم شيكولاته .. وبعدين أنا توقعت إن الحاجات دي

كلها هتفرحك أول ما هتشوفها.

— قصدك هتفرحك إنت لأنك بتحبها.

— وإنتِ مش المفروض تحبي/تفرحك الحاجات اللي بحبها/بتفرحني؟!!

— عارف، إنت ممكن تكون زي الشمس واضح جدا لكل الناس .. وماتتفهمش من

الشخص الوحيد اللي إنت عمال تبسطله نفسك وتشرحها له لأنك نفسك أوي

يفهمك .. نفسك مايكونش جاهل بيك بتحاول تخلق بينك وبينه مساحات تلاقى

بس هو كل مرّة بيعمل اللي يرضيه ويفرحه وإنت بتكون بالنسبالة وسيلة لده.. ولما

قلبك بيتكسر من أنانيته بتقوله معلش بكره يكبر ... خلينا نحاول معاه مرة ثانية .. فـ

بتحاول مرة واثنين وعشرة إنك تعلمه إزاي يقرأك بس كل محاولاتك هتكون من غير فائدة.. وفي لحظة هتقرر إنك تقف عن محاولة تعليمه ومش هترجع في قرارك أبدا مهما هو بينك إنه بيستجيب... هتقف مش لأنك استسلمت أو إن صبرك خلص ولا عشان هو زي التلميذ غبي ومُتعب.... هتقف لأن تصرف / فعل / إحساس وصلك خلاك تفهم إنه مادام مش فهمك من اللحظة الأولى يبقى مش هيفهمك خالص مهما حاولت .. ومهما حصل مش هتناقشه ولا هتبرر ولا هتشرح ولا تعبر ولا هتعمل أي حاجة تاني .. هتسكت وهـ تنتبه للي فاهمك وقاريك وحافظك من زمان أوي من أول كلمة هتمشي وتسيبه وآخر نظرة ليه مش هتكون عشان تحفظ ملامحه جواك... لأ هتأمله بيها وإن بتعاتب قلبك ازاي كان مُنساق ورا شخص جاهل بكل تفاصيلك ومهما حاولت معاه مش عارف يتعرف عليها!؟

بس هتحاول ماتزعلش منه/هتحاول تغفرله خذلان مش يارادته .. أصل مش ذنبه إنك ادبته كتاب يقرأه وهو أصلا مش بيعب القراءة/مش ذنبه إنك حطيته في مكان - واسع عليه أو يدوب مكفيه- مش ليه .

- يعني إيه؟

- ولا حاجة .. هات الأيس كريم.

(٢٠)

حدوتة أحلى

جيد أن تُدرك أن :

الأشياء التي نراها جميلة فـ نلهث خلفها لـ نحصل عليها ليس بالضرورة أن تفعل
مثلنا، لن نهرول هي أيضا باتجاهنا.. ولن تأبه باستجدائنا لها أن تقف في انتظارنا قليلا..
بل وربما تصدنا وتعلق في وجوهنا الأبواب.. وتظلّ تعاند - رغبتنا الشديدة في
اللاحق بها - .. و تستمرّ في الابتعاد عنا.. فـ علينا أن نتفهم و نتقبل هذا برضا ..
ولا نزيد ألنا بتعلقنا الطفولي بها !

- ماينفعش ترجعوا لـ بعض تاني؟

- اللي بيقدر يمشي مايفكرش يرجع تاني .. وأنا وهو أخذنا القرار مع بعض .. فـ
ماينفعش، أبدا.

- أبدا ! ليه القسوة دي؟!

- مش قسوة .. كده أحسن لينا إحنا الاتنين .. مادام كل واحد فينا قدر يكمل حياته
من غير التاني .. يبقى كل واحد فينا إدى للتاني فرصة لـ حياة أحسن .. لـ حدوته
تانية أعمق وأكمل كل واحد هيقابلها في طريقه.

- مش قادر أفهمك ازاي بتقولي الكلام ده وإنّ كنت بتموتي فيه؟!

- أيّ حد في وقت ما ممكن قلبه يتعلّق بـ شخص معين .. بيحس بالدفا معاه ، روحه بتكون مطمئنة في وجوده، بيخلق الشغف والحياة في كل لحظة.. إحساسه بيكون متنع في مجمله.. فيحبه أوي .. وكل لما بيعرف/يقدر يعبر عن إحساسه ناحيته /حبه ليه، كل لما بتزيد الأحاسيس دي جواك وبتزود يقينك بأنك مستحيل تقدر تعيش من غيره بس لما الزمن يعدي/إنت تنضج/ رؤيتك للأمور تتغير وتوضح شوية .. بتلاقي نفسك قدرت تعيش من غيره .. بتلاقي نفس الأحاسيس الحلوة دي مع غيره.. فـ بتكتشف إن مش هو بس السبب في تكوين الأحاسيس دي جواك.. إنت كمان كنت مشترك معاه في خلقها جواك وجواه.. فعشان كده مهما عشت بعده من أحاسيس مش بتندم على أيّ إحساس حلو شاركته فيه.. لأن جزء منه كان إحساسك إنت .. ولأنه كان حلو .. ولأنك استمتعت وقتها حتى ولو اتوجعت بعد كده .. عادي طول ما إنت عايش هتلاقي المتعة وراها وجع .. و الوجع وراه متعة .. المهم ماتندمش على أيّ إحساس عبّرت عنه أو أيّ متعة عشتها مادام مكانتش السبب في أذى أو ضرر حد.. و كمان ماترعلش من أيّ وجع عشته أو هتعيشه حتى لو علم واتحفر جواك .. ولو زعلت اتصالح معاه عشان تقدر تشوف الحكمة من وجوده جواك.

- وإيه الحكمة اللي قدرتي تشوفها من وجوده جواك؟

- إن مش لازم أيّ حد يدخل حياتي يفضل معايا للنهاية.. كل اللي مشي كان ليه دور/مهمة/قدر ولما خلصه.. وجوده مبقالوش لازمة فكان لازم يمشي .. فـ بقيت أبطل أمسك في حد .. اللي عايز يمشي بودعه .. واللي عايز يقعد أهلا وسهلا بيه .. بس مش بسمحله إنه يمّني بوجوده في حياتي .. لأن ده قراره/اختياره/قدره ولو بعد شوية وقت قرر هو كمان يمشي برضو مش بتحايل عليه يقعد .. مع إني بجد حبيتهم واتعلقت بيهم أوي .. وكل واحد بيمشي بياخذ جزء من روعي معاه لحد ما بقيت حاسة إن مكان روعي فاضي وإني بقيت متبلدة المشاعر وده إحساس فظيع

ومؤلم جدا خلاني قررت أسطح علاقاتي بأي حد في طريقي عشان ماتوجعش أكثر ..
بس الحقيقة إن الإنسان مايقدرش يعيش من غير حب/دفا/ونس فبقيت مؤمنة
إني مش هفضل ماشية في طريقي لوحدي .. أكيد إيدى الباردة في وقت ما هتمسكها
إيد دافية .. وروحي الضايعة هتتلاقى .. وتعب الطريق هيخف كثير
بالحب/الونس/الدفا وإن كان للحظات.

(٢١)

حبيته؟

*

لستُ آسفة لـ رحيلي .. ولكنني أتمزق وجعا كلما مررت في خيالي و كنت متألماً
تعاني من شيء ما وأنا لا أستطيع أن أكون بجانبك لأرّبت على وجعك.. وأهمس
لـ قلبك، لـ روحك : لا بأس، كل شيء سيكون بخير.

— حبيته؟

— حبيته احتياجه ليا/تعلقه بيا ... وقتها كنت حاسة إني ماليش
وقت/مكان/قيمة/مكانة في حياة حد .. وإني لو حدي أوي .. ووجعني أوي إحساس
إني منسية أو هتنسى .. إن كل اللي بجهم ينشغلوا عني في حياتهم وينسوني .. فـ
كنت محتاجة حد يثبتلي العكس .. كنت محتاجة جدا حد يحسني إنه محتاجني /إن
وجودي فارق معاه فـ اهتمت بيه وإديته من مشاعري كثير .
— يعني إنت كمان كنت محتاجاه، أو مال اتخليتي عنه ليه؟
— لأن الاحتياج مش حب... هو كان محتاج يتعلق بأي حد/ أي حد يهتم بيه .. أي
حد مش لازم أنا .. يعني لو لقي أي حد يهتم بيه أحسن مني هيتعلق بيه، وأنا برضو
كنت محتاجة احتياج أي حد ليا /أي حد أكون مسؤولة عنه/أي حد أساعده وأهتم بيه

/أيّ حد يملئ شوية من الفراغ اللي جوايا وفي حياتي .. وطول ما الحد ده موجود
 وبيعوض النقص بوجوده بيحسني إني بعمل حاجة مهمة .. وطول ما الحد ده مش
 بعد ولا اتشغل في حياته هفضل أنا واقفة مكاني .. هفضل راسمة حياتي حواليه .. واقفة
 في نقطة معينة منها لا بقرب ولا بعد .. وأول لما هو ياخذ خطوة بعيدة عني .. يرجع
 الفراغ تاني .. وبيضطرنى أدور على حد تاني أمارس معاه نفس الدور .. وأكرر نفس
 اللي فات معاه .. وأفضل أدور في دايرة من الفراغ والامتلاء .. كل واحد فيهم
 بيودي للتاني .. وأصعب حاجة إن ولا إحساس فيهم بيكون كامل .. ولا فراغ كامل
 ولا امتلاء كامل .. دائما فيه حاجة ناقصة .. زي بطارية الموبايل .. لا بتكون فاضية
 خالص .. ولا بتسييها على الشحن لحد ما بتوصل ١٠٠% .

**) (

لا أتبع معك استراتيجية لـ أبدو صعوبة المنال .. ولكن في داخلي هوة عميقة ... لن
 تستطيع ملأها .. سـ تبتلعك وتنتظر المزيد.

— حيتيه؟

— لأ .. بس كان ليه دور مهم في إني أتحرر شوية من طفولتي .. إعجابه بيا صحى
 الأنثى اللي جوايا واهتمامه المفرط بكل تفاصيل الأنوثة خلاني بقيت أحب أشوف
 نفسي حلوة في عينيه ... يمكن لأني دائما كنت شاذة عن أغلب بنات جيلي .. ما كنتش
 بفكر في الحب ولا بهتم بنفسى أو بظهر جمالي .. كنت دائما بحس إني لسه طفلة .. لحد

ما قابلته وصحى جوايا مشاعر كثير .. خلايني آخذ بالي إني كبرت وبقيت بنوته حلوة
ليها قلب نفسه ينبض بالحب ومشاعر نفسها ترفرف زيّ الفراشات .. بس ياريتة ما
خلايني آخذ بالي إني كبرت.. و ياريتني كنت فضلت طفلة!

– يبقى حبتيه؟

– قولتلك لأ.... بس هو صحى مشاعري وماعرفش محتويها ولا أنا عرفت أهدي من
قوتها واحتياجها الشديد للاحتواء .. و شعل جوايا حنيني للحب وماعرفش يملك قلبي
ولا أنا عرفت أظفي الحنين الشاعل جوايا.... ف بقى عامل زيّ اللي حضر العفريت
وماعرفش يصرفه ... فحاول يصاحبه ويوصفله أد إيه هو متعذب في حيي .. أد إيه
بيستنى مني كلمة أو نظرة وأد إيه أنا ببخل بيهم عليه والعفريت مكانش عنده
مانع إنه يسمع تنهيداته وكلامه الحلو ... بس أول ما يفتكر إنه خلاص قدر يملك
العفريت ويبدأ يقرب ... يهيج العفريت ويجبره يبعد الخطوة أو الخطوتين اللي قرهم.
– كنت بتحسسيه إنك صعبة المنال؟

– مكانش عندي الخبرة عشان أقدر أعمل كده.. بس كنت ببعده لأن هو مكانش
قادر يشوف العفريت من مسافة بعيدة .. كان معتقد أو عنده يقين إنه شكله حلو أوي
.. لو قرب كان هيشوف تفاصيل مليانة نواقص ومكانش هستوعبها أو يسيبها تكمل
بعض .. مكانش هيحب فيا جنوبي وقسوتي وكآبتي وكبريائي وضعفي وسيئاتي زي ما
هيحب عقلي وطبيتي ومرحي وحنيتي وحسناتي .. مكانش هيسيبي أعيش طفولتي
وأنوئتي مع بعض .. المهم عنده هي الأنثى اللي صحاها .. التحفة اللي اكتشفها ..
لكن الطفلة مش مهم .. عادي إنه يجرح براءتها ويخليها تستخبي .. عادي إنه يخوفها
ويضطري عشان أهميها إني أحبسها في أوضة ضلمة مفيهاش نور ولا شمس ف تموت
من الخوف والبرد وأنا مش عايزة أعمل كده .. مش مستعدة أتخلي عن الطفلة
اللي جوايا عشان خاطر الأنثى اللي هو عايزها.

- مش مقتنع ... البنت يعني أنوثة .. إنت محتاجة منه يتغزل في أنوثتك ولا ياخذ باله من براءة طفولتك؟!!

- طب اقرأ كلمات " غادة خليفة " يمكن تفهمني ومش لازم تفتنع:
" نحتاج أن نعيش طفولتنا وأنوثتنا معاً "

جمالنا وضعفنا ... نصفنا التائه ونصفنا المجنون ونصفنا الذي لم نكتشفه بعد
نحتاج أن نكون بكل وجوهنا مندمجين بالكامل داخل علاقة حية
غالباً يدخل الناس العلاقات بجزء صغير منهم وبقية أجزائهم تتفرغ للمراقبة
يراقبون أنفسهم ويراقبون الآخر
فلا يحصلون على متعة حقيقية ولا يمسهم الدفء إلا قليلاً "

(***

أن تُحبّني .. لا يعني ذلك أن يحق لك قصّ أجنحتي أو أن تصنع لي قفصاً وتُكبّلني خلف
قضبانه.. بل الحب - حرية - يكفل لي حقي في الطيران.

- حبيته؟

- حبيت جرأته في أنه يدخل كل شوية في علاقة وكل مرة قلبه يبقى مستعد للحب
- ودي حاجة حلوة عشان تعجبك؟

- مش لازم تكون حلوة عشان تعجبني .. مش بيقولوا الممنوع مرغوب

والمرغوب بالنسبالي (وبالنسبة لكثير غيري) هو إن يكون عندي -عندهم-

شوية صغيرين أوي من جرأته... لأن الحياة وتجارب - اللي مش نجحت - الناس اللي حوالينا بتتحفر جوانا و بتعلم كل واحد فينا الحذر .. بتخليه يفكر ألف مرة قبل ما يصدق مشاعره أو مشاعر غيره .. ولو حصل ودخل في علاقة بيبقى خايف لـ يفشل لـ يتوجع أو يوجع غيره فـ تلاقيه بيقدم رجل وبيأخر رجل .. لأنه محتاج أوي يظمن إن ده الطريق الصحيح للبيت، للسكن .. محتاج يتفهم/يتظمن قبل ما يتحب .. وعشان يتوفرله ده لازم هو والطرف التاني يفهموا إيه بيخليه يتراجع خطوات لو قدم خطوة .. إيه بيخليه يقول أي كلام مش مفهوم مش مترابط ويلجأ لـ أي حيلة تساعد في إنه يهرب ويبعد أوي أي حد عن حقيقة مشاعره وهو للأسف مكانش واخذ باله من النقطة دي .. كان عايز يحب ويتحب من غير ما يبذل مجهود في إنه يفهم ويتفهم .. فاكر إن الحب "بجك ، وحشتيني ، مكالمات بالساعات ، هدايا عيد الحب والميلاد ، تحكمات بـ مبرر الحب زي" ماتخرجيش من غير إذني ، ماتأخريش برا عشان بخاف عليك ، أول ما اتصل تردني عليا على طول عشان بقلقي ، امسحي كل أصدقاك الأولاد من حياتك عشان بغير عليك، هاتي الباسوورد عشان بجك ، " ، ورسم حوارات كثيرة واختراع معاني غريبة لـ جملة عادية قولتها بتلقائية وطاقة حب بتتهدر في شرح ومبررات وإثباتات وحناقات مش بتنتهي "

مش هو ده الحب اللي أنا محتاجاه .. مش محتاجة حب يخليني عصفور محبوس في قفص بيص من ورا القضبان بعيون مليانة أسى وحرمان .. وسجانه حبه ليه بيتترجمه في شوية أكل ومية ومش واخذ باله إن شهيته للأكل وللحياة نفسها بتقل لأنه حرمه من التحليق لحد ما ماتت جواه الرغبة في التحليق/الحياة .

الحب إنك تطلق سراح اللي بتحبه/تساعده يرفرف ويعيش .. مش تفصله أجنحته وتحطه تحت الإقامة الجبرية.. الحب لو ليه قيود بتكون قيوده حرة .. كل طرف لما

بيبعد بيكون حبيبه معاه وجواه .. كل كلمة/إحساس/تصرف بيعمله بيكون عشاقهم
هما الاتنين من غير ما الطرف التاني يطلب أو يجبره على كده .. لأن كل واحد فيهم
من بداية العلاقة بيكون قاري وفاهم كويس الطرف التاني .. وعارف إيه هي احتياجاته
بالظبط وتلقائيا بكل حب وبكامل إرادته ورضاه — مش بالطلب ولا الإيجابار —
يوفرهاله على قد ما يقدر .
— وقولتيه كل الكلام ده ؟
— أه ومش فهم .. رد عليا وقال " يعني بتفرضيني وأنا بجدك؟! " ، فـ قولتله اقعد مع
نفسك وعدّ البنات اللي حبيتهم — اللي افكرت إنك بتحبهم — وزى ما نسيتهم
هتتساي.

— بس كده جرحتيه

— الحقيقه زي ما بتجرح بتشفي .

كم قسوت عليك بالكلمات لعلك ترحل .. ولكتك بقيت .. فقط بقيت في مكانك
.. لم تقترب ولم يكن لديك القدرة على الحد من ابتعادي عنك !

— حبيته؟

— حبيت نظرته القلوقه الحنونه لما مثلا أكون سرحانه شويه وسط مجموعه وأرفع عيني
ألاقي نظرته دي مركزة معايا .. بس مكانش مسموحلي ألمس الحنان اللي شايفاه في

عيونه خوفه إنه يخسرنى خلاله قنوع أوي بمكانه في حياتي ... الحقيقة إن أنا وهو
كنا شبه بعض أوي بطريقة غريبة في الموضوع ده .. والتشابه ده زي ما قربنا لـ
بعض أوي .. بعدنا أوي.

– ازاي؟

– زي ما هو كان حريص أوي إنه مش يخسر وجودي في حياته .. أنا كمان كنت
حريصة أحتفظ بـ حنانه وإن كنت حاساه ومش قادرة ألمسه ... وكأنا كنا متفقين
–من غير مانفق– إن كل واحد فينا يبقى قنوع بمكانه في حياة الثاني .. ومايجاولش
يقرب خطوة زيادة أو يطالب بمكان أكبر لـ يخسر مكانه الأساسي كنا بنثق في
بعض ثقة "عدم الخذلان" لأننا مش مضطرين نوجد بعض وعود ممكن مش نقدر
نفذها .. كنا مقتنعين إننا لو قربنا شوية ممكن نجرح/نوجع بعض .. مجرد التصور بس
كان بيخلي كل واحد فينا يتمسك بمكانه بس .. فـ ماكانش بتتكلم عننا أو عن
احتياجاتنا .. طول الوقت كنا بتتكلم عن – النجوم والسما والطيور والبحر والورود
– الجمال اللي في الدنيا لحد ما خلصنا كل الكلام عنهم .. وأي كلام تاني بقى مكرر
..... فـ وجودي /حنانه المحسوس بمقاس قادر يمنع الملل /الفراغ/الحيرة/الوجع
حقيقي كان عنده استعداد يلونلي كل الحقايق المزعجة ويخليها قوس قزح رائع عشان
بس أنا مبسوفة وأنا كان عندي استعداد أدله على النور اللي تايه عنه عشان
ينور الضلمة جواه بس مكانش حد فينا عنده طاقة تشدني وتشده من جوا خوف
إننا نخسر بعض /طاقة نجازف بيها بـ مكان كل واحد في حياة الثاني ونطالب بـ
مكان أكبر أو مكان واحد يجمعنا سوا.

(٢٢)

أمنية قلبي

قد كان دُعائي الدائم إلى الله: (اللهم ارزقني "يقينًا" يصلح لأن أتكأ عليه دون أن يهوي بي) وعندما مال قلبي لك، تمنيت لو كنت أنت " ذلك اليقين " لـ أهبك أيام عمري، وأتكأ عليك.. ولكن رفضَ عقلي عرقل الطريق أمام تحقيق أمنيّتي، فأضفت عليك من نفسي لـ تصبح تلك الصورة التي أتمناها وأنتظرها بـ هففة.. وتمرّ الأيام فإذا بي أكتشف أنني صنعتُ وهما وأضفتُ عليك ما ليس بك وطالبُتُ بأكثر مما تتحمّل وانتظرتُ منك ما لا يمكن أن يصدر عنك/ ما لا تستطيع تقديمه لي.

— أنت مُخيفة!

— مُخيفة! ليه حد قالك إني باكل العيال!؟

— أسوأ ، لما بتحبي حد بتبقي عايزة توصلي لـ روحه

— وإيه يخوّف في كده؟

— فرناندو بيسوا قال : " كم هي جميلة الأشياء في الرؤية الخاطفة " وده بيفسر

ليه حب من أول نظرة!؟ ليه القلب يميل بسرعة في الرؤية الخاطفة؟ نظره الضعيف

مش بيخليه يقدر يشوف الديفوهات .. فيتهيأله إنها جميلة زي ما شافها ، نظره

الضعيف مش بيخليه يقدر يوصل للروح .. واللي أعتقد إنها أرق جزء في الإنسان ..

أبيّ تشويه يحصل للإنسان ببيان فيها أوي .. وإنت بتبقي عايزة توصليلها عشان كده.. مش بتقتنعي بـ رؤية القلب الخاطفة... وده الجزء اللي بيخوف فيك - ليه فيه جزء تاني؟! -

- أه الجزء الغبي/الضعيف/الأناني أول ما بتوصلي للروح بتشوفي كل حاجة بوضوح أوي ، وضوح صادم بيخليك تتلخبطي شوية .. الشوية دول بيكونوا كافيين أوي للقلب إنه يستغل اللخطة دي ويقنعك إن أي عيب/اختلاف هيقدر يغيره ، يقنعك إنك ممكن تجملي الروح دي في خيالك ، ممكن تضيفي عليها من نفسك/أحلامك/الصّفات اللي بتعجبك/احتياجاتك عشان تكون زي ما بتتمني . - كلنا جوانا الجزء المخيف والأناني.

- ازاي؟! -

- زمان وإحنا صغيرين كل واحد فينا كان بيشفو القمر ماشي معاه/بيرافقه على الطريق ، والورود أول لما تشوفه تتحرك أوي وكأنها فرحانة بوجوده وبتبعته سلام، والشمس بتشرق كل يوم الصبح عشانه هو / عشان تصحيه، والعصافير بتساعدنا وتغردله ، والبحر صاحبه هو لوحده.. وكان بيزعل أوي لما حد كبير يقوله إنه بيتخيل .. إن القمر ثابت ومش بيتحرك معاه، وإن الورود مش بتسلم عليه ده الهوا هو اللي بيحركها، وإن البحر والشمس والعصافير لينا كلنا مش ليه هو لوحده.. ومع إننا كبرنا أوي وخلاص اقتنعنا - ومبقيناش نزعل - إننا كنا بنتخيل ... بس لسه جوانا جزء طفولي بيحب يشوف الحاجة زي ما بيتمني.. وعشان يتقبل حد في حياته يبقى لازم يكون بالصورة اللي هو عايزها .. يمكن لأن الجزء الطفولي ده لسه مليون حاجات حلوة أوي محتاج يديها لحد بس محتاج أكثر يديها للي يستحقها .. ولأنه لسه نضيف أوي فـ ببقى أناي أوي في حرصه ودقته في اختيار الحد اللي هيتفاني في عطاءه ولأنه برضو لسه بريء أوي فـ بنقدر نخدعه ونخلقه صورته مثالية ... وإحنا مش لأننا

وحشين بنعمل كده، لأننا محتاجين حقيقة/يقين كـ عكاز نتسند عليه وبيه نقدر نكمل طريقنا.. بس لما فجأة الحقيقة بتتعري قدامنا.. إما هنعمل زي ما كنا بنعمل زمان وإحنا صغيرين.. نزرع ونغمض عينينا أوي عشان مش نشوف الحقيقة أو هنعاند ونفتحها ونقع لما مش نلاقي العكاز اللي كنا مسندوين عليه/لما مش نلاقي الصورة الحلوة اللي كنا بنرسمها للناس جوا دماغنا عشان تخلي الدنيا محتملة/لما نقرب أوي ونشوف التفاصيل اللي أكيد هتهد كل اللي بيناه.. لأن التفاصيل مليانة نواقص/عيوب/فراغات مش بنقدر نتقبلها/نستوعبها/نكملها..... لو كنا قدرنا/لو كنا حسينا بالارتياح والفرح لما شوفنا الصورة من قريب أكثر من لما كنا بنشوفها من بعيد.. وقتها بس كان ممكن كل واحد يقول بثقة إنه حب الصورة زي ما هي من غير ما يحاول يغيرها خياليا أو واقعا.

- يعني ما حبت هوش؟

- حبيت فيه شخص تاني، حبيت الشخص اللي هيكون عليه بعد ما أُغَيِّر فيه/بعد ما أضيف عليه اللي هيخليني أحب روحه أوي.

(٢٣)

صراع منهنك !

تملأنا العُقْد .. نتلاقى وإيّاها .. ف تُفك .. ربما ل تُعقد في عقدة واحدة لا تُفك
أبدا!

- مالك؟

- جوايا فوضى وحيرة مش فاهمة سبب وجودهم.

- ليه؟ احكي لي يمكن نقدر نفهم مع بعض.

- مش عارفة.. أكون مرتاحة وفرحانة وفجأة أحس بـ نغصة في قلبي، دماغي شغالة
على طول بس مش عارفة أمسك ولا فكرة بتدور فيها، محتاجة آخذ قرارات كثير بس
التردد بيعطني ، عايزة أنسى حاجات كثير وأتعايش مع حاجات تانية بس مش
قادرة.

- يمكن لأنك عايزة تعملي ده كله مع بعضه .. بالراحة على نفسك .. واحدة
واحدة.

- ازاي والعقد جوايا كثير .. وأصعب حاجة لما أقعد ألف حوالين نفسي عشان ألاقي عقدة واحدة ومالاقيش أو ألاقيها وماعرفش أفكها .. ف أهرب بالنوم، بالضحك، بالكلام، بأيّ حاجة.

- بس الهروب مش حل؟

- عارفة بس أنا مش قادرة ألاقي الخيوط اللي العقد اتكونت منهم .. وعشان كده لما بمحاول أفكها بعقدها أكثر زي " اللي بييجي يكحلها فيعميها " .. عارف زي إيه؟ زي وإنت " بتلضم " الخيط في الإبرة ولأن أوقات الخيط بيكون طويل فمش بتقدر تتحكم في اللعبكة اللي بتحصل فيه .. ممكن تلاقي عقدة اتكونت في النص أو في الأول أو في أيّ حته مش مناسبة .. بتحاول تفكها وممكن تنجح بس غالباً مش بتعرف وكمأن ممكن تعقد الخيط أكثر وتتكون عقدة تانية وتالته، كل واحدة موجودة في حته من الخيط أو كلهم متجمعين فوق بعض في عقدة كبيرة أوي، ولو حاولت تقصهم من الخيط عشان ترجعه مفروود تاني، هيقصر الخيط أو هيبوظ خالص. ف لو شبّهت جوانا بالخيط المفروود، هتلاقي إن فيه عقد كثير .. فيه منها البسيط اللي بنلحقه من الأول .. يعني يادوب بتكون لف الخيط مرة واحدة .. ف بنجح إننا نفكه، وفي منها المعقد جدا ... ودي بتكون مخيفة جداً لأنها مش بتكون ظاهرة وواضحة زي ما بتكون في الخيط .. ف بنتعب ونختار عقبال لما بنلاقيها وعقبال كمان لما بنقدر نفكها .. أصلها عقبال ما اتكونت جوانا أخذت وقت وإحنا مش واخدين بالننا لما الخيط اتلف مرة واتنين وتلاتة، بس كنا بنحس بـ خنقة - مش عارفين سببها - لما الخيط بيتلف والعقدة بتتكون.

العقدة دي بتكون عبارة عن وجع ملازمك دايماً، عبارة عن شرخ عميق أوي جواك بيكون غير مرئي ليك أو لـ أيّ حد بس إنت حاسه أوي وإنك تقدر تعمل تعرية لغموضها -العقد- ده بيكون مؤلم أوي .. فعشان كده في أغلب الأوقات بنلجأ

للهرب .. لما الشيء الغامض ده بيستخبي - حقيقته - في اللاوعي .. وفي نفس الوقت الوعي بيدور على ايه سبب الوجد ده لأنك تعبت ونفسك ترتاح .. والصراع بين الخوف من المواجهة بالهرب وبين أمنية الشفاء بيكون صعب ومؤلم جدا .. إنك تكون مش عارف سبب الوجد اللي مصاحبك دائما ده .. ونفسك تخفّ أوي منه .. ومش عارف ازاي .. مُنهك جدا !

- إدي وقت لنفسك ومش لازم دائما تقاومي .. ممكن عملي هدنة لحد ما ترتاح أعصابك .. ومع الوقت هتلاقي/ هتعرفي كل الخيوط اللي اتجمعت منها العقدة.
- صح ... كل حاجة بتودي للتانية .. كلهم موصولين ببعض .. لو عرفت أمسك أول الخيط يمكن أقدر أوقف توهاني/ دوراني المستمر في المتاهة.

(٢٤)

واحة الراحة

أن تلهث حتى تنقطع أنفاسك ولا تقف، لا يعني دائما أنك تريد اللحاق بشيء ما..
ربما لا شيء تفعله غير هذا.. وربما لأنك تحتاج أن يلحق بك شخص ما يمسك يدك
ويجبرك على الجلوس ويخبرك أن : " كفى .. كل شيء سيكون بخير "

-
- أنت بتختفي فين؟
 - في النوم.
 - وبتعملي إيه غير النوم؟
 - بصحى.
 - لا والله ! طب وبعدين؟
 - ولا قبلين .. هفضل أنام وأصحى ، أنام وأصحى لحد ما أوصل.
 - وهتوصلي امتي؟
 - مش عارفة .. كل ما بوصل لـ آخر الطريق بكتشف إني لسه في الأول.
 - يمكن لأنك ماشية في طريق غلط.

- ويمكن لأن الطريق بقى متاهة /دواير كثير .. بدور فيها/جواها وكل ما أحس إني خلاص قربت لنقطة النهاية بلاقي نفسي عند النقطة اللي ابتديت منها.
- طب ما تقفي في مكانك يمكن تلاقي حد يساعدك ويدلّك على طريق الخروج.
- لو كنت تايه وفكرت عشان مش تتوه أكثر : إنك تبطل مشي وتقعّد في مكان مش تتحرك منه، ده مش هيمنع توهانك أو بمعنى أدقّ مش يخلي حد يلاقيك ويعرف طريقك.. لأنه ممكن هو كمان يكون تايه أو يتوه وهو بيدور عليك.
- مش فاهم .. قولتلك كذا مرة بطلي الفلسفة دي.
- بص، أوقات بيكون صعب أوي تقول كلام معين أو تمشي في طريق نفسيا هيتعبك .. بس بتقول /بتمشي كذا مرة .. بتضغط على لسانك عشان ينطق وعلى رجلك عشان تتحرك .. وياريت فيه نتيجة .. مفيش، وكأنك بتدور في دايرة مفرغة /متاهة مش عارف تخلص منها أبدا، لأنك بـ إرادتك بتتحرك فيها وإن كان ده صعب عليك .. بس مفيش حل .. مفيش اختيار تاني .. هتعمل إيه غير إنك تدور تدور، يمكن فيه أمل /نهاية .. المشكلة وانت بتحاول تمسك أول خيط في المتاهة دي عشان تقدر توقف دورانك/توهانك بـ تقع وتترمي في أي ركن ما حدش هيلاحظك .. وحتى لو حد خد باله إما مش هيكون عنده طاقة كافية تقوّمك أو مش هيصدق أصلا إنك وقعت.
- ليه مش هيصدق؟! هيكذب عينيه؟
- أه هيكذبها لأنه عارف إنك دخلت في متاهات أسوأ من المتاهة دي وخرجت ومش وقعت.. هو مش مُدرّك إن لما كل الخطبات تحصل ورا بعضها، بتخدر إحساسك، وبالتالي مش بيطلع منك رد فعل منطقي .. بتمارس حياتك عادي ولا كأن في جروح متخيلة لازم تحاسب عليها لـ تتفتح وتترف .. ومع التّريف والتجلط، أعضاءك بتتداعى وقواك بتخور وبتقع .. ولما بـ تفوق بيكون الألم غير محتمل ومهما أخذت من مسكنات قوية مش بتخف حدته، ومش بيبقى قدامك غير إنك تتحمل لحد ما يهدى

.. فـ بتحاول تدور جواك وفي حياتك على حاجة / شخص / شعور .. توجه الألم
ناحيته.. تستدعيها في ذاكرتك كل لما الألم يشتد .. عشان تبقى زي واحه الراحة اللي
بتلجأ ليها عشان تساعدك إنك تتحمل الوجع.

– طب ما عملي كده؟

– بمحاول.

(٢٥)

المتفرج الصاجز

بداخلكَ وحشة تستحضر شوقاً.. والشوقُ يستحضر أرواحًا لتهمس لهم بمخاوفك،
تنوهم بوجودهم، تتعلق بهم في خيالك.. ف يأتي الإلهام.. تكتبهم في كلمات ولا تنتهي
مخاوفك.. وتزداد الوحشة.. ترغب بشدة لو تحمي منها، ف تندثر بها.

– لو سمحت بلاش تبصلي بالنظرة دي.

– ليه؟!

– لأنها دافية وحنونة أوي، بتخليني أحس ببرد وعتمة وحدتي وأد إيه أنا محرومة من
لمسة/كلمة/نظرة حنان!

– المسافة اللي بينا تقريبا خطوتين .. لو تسمحيلي أقربهم .. وحدتك ووحدي
هينتهوا.

– ولو إحساسك المسنود عليه خدعك وطلعوا أكثر من خطوتين .. هتتعب وتبطل
تقرب؟

– لأ مش هبطل .. فيها إيه لما أتعب عشان أرتاح؟!

– فيها إنك ممكن طاقتك تخلص قبل ما توصل.

- لما يحصل ده ليه إنت مش تحاولي تقللي المسافة اللي فاضلة بـ أنك تقربي الخطوات
اللي باقية وتوصليلي؟!

- لأني وصلت لدور المتفرج العاجز عن فعل أيّ شيء.

- وعاجبك الدور؟

- أكيد لأ .. بس حاولت أغيره لقيت - مشاعري - - واقفة عند حد
اللامبالاة.

- اللامبالاة! بمعنى؟

- بـ معنى إنه مش/مابقاش هأمني اللي يمشي أو اللي يقعد ، اللي يقرب أو اللي يبعد
، اللي يزعل أو اللي يهتم ، في جميع الأحوال مش يحاول أبدل أيّ مجهود مع أيّ
حد فيهم .. يعني اللي عايز يمشي/يبعد/ يزعل بسببه ومش بجري وراه أو أحايل فيه
وأشرح وأبرر و أصالحه، واللي عايز يقعد/يقرب/يهتم بسببه برضو بس مش بفرشله
الأرض ورد ولا بفضل أشكر فيه كل شوية ولا بسمحله يفضل يمّني بقربه ووجوده.

- طب وليه؟! ليه مش تشكري اللي بيهتم ومش تصالحي اللي زعل وبعده؟!

- عشان إحنا كـ بشر لينا طاقة تحمّل لما بتخلص، كل الخيوط بتفلت من إيدك ..

كل الشبابيك والأبواب اللي بتكون قافلها كويس بتتفتح وبتدخّل هوا شديد بيظفي
كل الشموع المنورة و بيظير كل حاجة من مكانها ويوقعها على الأرض فـ اللي يتبعثر
واللي يتكسر واللي يتفتفت وإنت واقف في وسط كل ده مش قادر تستوعب اللي
بيحصل .. و مش عارف تبدأ منين عشان تصلح الخلل ده ... تصلح قفل الباب اللي
بيخرّج ويدخّل أيّ حد في أيّ وقت .. ولا تقفل الشباك اللي اكتشفت إنه عبارة عن
ازاز اتكسر من شدة الهوا .. ولا تلم الحاجات المتبعثرة حواليك اللي كل شوية تتكعبل
فيها وتقع على وشك .. ولا تنور الشمعة عشان تشوف ومش تتعور من الازاز اللي
على الأرض .. في وسط كل ده مش بتلاقي عندك طاقة عشان

تحايل/تصالح/تقرب/تشكر/تتم/تبرر/تعبر/تشرح أو حتى تحتاج/تتوسل/تستجدي..
خلاص وصلت لدور المتفرج العاجز عن فعل أيّ شيء عارف، إنك تبطل تقول
لشخص ما مش يمشي ويسيبك لوحدك.. أو يستنى لحد ما تبقى كويس.. أو إنك
محتاج وجوده، إنك تبطل -تحتاج، تطلب، تتوقع، .. - مش دايم وحش،
صح هتكون وحدك مع كل أوجاعك واحتياجاتك للحد اللي ممكن تنسى أو مش
تتقبل شعور الاحتياج بعد كده، بس ده مش هيخلي حد يحسسك إنك حمل ثقيل أو لما
طاقته تخلص -بما إنه بشر- يسيبك وانت مسنود عليه ويمشي فتقع.. أو يمتنك إنه
استحملك كتير وخلاص بقى كفاية عليه كده.. أو إنك تكتشف بعد كده إن
مشاعره/وجوده/قربه كانوا مشروطين بـ مقابل
عارف امتي شعورك بالاحتياج وسندتك على حد هيكون حلو أوي؟ لما يكون هو اللي
عايز/حبيب يكون سندك، لما يكون جنبك لأنه مبسوط بوجوده معاك في كل حالاتك،
لما كل أوجاعك واحتياجاتك مش بتمثل ضغط عليه/ مش حمل ثقيل عليه بالعكس
هيحس إن الدور اللي بيأديه في حياتك محلي لحياته معنى عميق وحلو أوي فـ عمره
ما هيزهق منك أو يشوفك مش حلو لأنه من البداية شافك من جواك كويس ومش
خاف ولا زهق ولا تعب ولا بعد وسابك وحدك ولو ثانية.

(٢٦)

زهد

وأنا في قمة غضبي ويأسي واهياري.. تُحدّثني عن الأمل والحبّ والأحلام و تطلب مني أن أفرح وأمرح و أحيأ.. كيف، وأنا عاجزة عن أن أفعل؟! كلماتك تُثير بداخلي الامتعاض و تغضبني أكثر وأكثر.. أتراني غبية ! لو كنت أستطيع لكنت فعلتُ دون أن تُخبرني.. الآن أنا عاجزة عن فعل أيّ شيءٍ ولا أحتاج أن أستمع لـ كلمات ونصائح أعرفها جيّدا ورددتها لـ نفسي ولغيري كثيرا.. لذا فلتصمت رجاءً.

-
- كلام جميل .. بس إحنا داخلين على العيد حاولي تكتبي حاجة تفرّح.
 - تفرّح! طيب.
 - أيّ حاجة مفرحة تخرّجك من المود الكئيب ده.
 - كئيب! طيب
 - طيب، طيب، طيب ، ! أنا زهقت.
 - ماشي.
 - مش بهزّر، أنا مش عارف أعملك إيه.
 - ولا حاجة.

- إنت مابقتيش بتكلمي ولا عايزة ولا بتحاولي تقولي مالك.. طب اخرجي غيري جو .. الدنيا فيها حاجات كتير حلوة.. عيشيها واستمتعي بيها.
- عارفة إن فيها حاجات كتير حلوة.. المشكلة إني مبقاش عندي اشتها لآي حاجة ولا للحياة نفسها.
- معلىش فترة وهتعدي.
- تفتكر؟!
- أه بلاش يأس.
- عارف كل واحد في الدنيا مرّ بفترة كان ظاهريا يائس/لامبالي/ساخر/غاضب من كل حاجة .. بس دي مش بتكون الحقيقة.. مش حقيقة إنه بيكون عايز حياته تقف والدنيا تخلص .. الحقيقة إن هو بيدعي اليأس.. بيتعمّن في التّكر .. على أمل إنه يلاقي نور بسيط في طريقه المظلم .. على أمل إنه يلاقي أيّ سبب يخلي حياته معنى وقيمة.. ويفضل مترقّب اللّحظة دي .. ومتهياّلي ده طبيعي .. لأن كل واحد محتاج سبب/هدف/دافع عشان يقدر يستمر في عمل حاجة/يمشى في طريق/ في حياته عموما.. ولو مفيش، لو وقع مش هيقوم/لو تعب مش هيحاول / لو لو مش هيعيش ، هيستسلم للحياة اللي عايش فيها ميّت وهو حي. بس أوقات بيتعب كمان من استسلامه، بترهقه مشاعره الغارقة في الذبول والاكتئاب، ويحاول ينقذها وينقذ نفسه بأيّ قوى معاكسة ولو كان خيال، بيستوجد أيّ سبب من مفيش .. بس كل محاولاته في النهاية بتكون عاملة زي البينج بتخدعه و تديله وهم الحياة ! بيكتشف إن الواقع "الحياة الخارجية " - الحلول /الطرق/المتاح والغير متاح/ الأبواب المفتوحة واللي موارد واللي مقفولة / و كمان أفكارك وقناعاتك والمعرفة والقوى اللي اكتسبتهم بالاحتكاك معاه - مش بس هما اللي بيحركوه و يخلوه يقاوم أو يتكيّف/ يقبل أو يرفض / يحاول أو يستسلم.. فيه جواه حياة ثانية، ليها طبيعة عميقة وحساسة

أوي، ليها أحلام ورغبات واحتياجات .. هي كمان بتتحكم مع الواقع في صنع كثير من أفعاله /مصائره. أوقات الواقع بيكون قاسي أوي، ويقفل كل الطرق والأبواب والحلول قدامه وكمان بيهزم أي قوى بيستعملها معاه، ويفضل يهد فيه ويدوس عليه لحد ما يخسفه تحت الأرض.. وفجأة - بعد ما يقرر إنه ينعزل ويقاوم الخروج للواقع - تيجي هي - الحياة الداخلية - تطلعه وتنفض التراب اللي عليه وترفعه لفوق في السّما، وأوقات تانية العكس، الحياة الداخلية بتتهدّ جواه ومش بيقى ليها أي معنى أو وجود والخارجية هي الأصل اللي لازم يرجعه في النهاية ، لحد ما بيتعود.. والتعود ده ولو أنه ممل وسخيف أوي بس على الأقل بيفتحله باب لما كل الأبواب تتقفل في وشه.. بيساعده كل لما يفتكر إن اللعبة خلاص وصلت للنهاية. المشكلة بتحصل لما قوى - الحياة الداخلية والخارجية - بتتحد لأهم إما هـ يرفعوه فوق في السّما أو يخسفه تحت الأرض.. وفي الحالتين بيكون خسران.. لأن مكانه على الأرض، لا فوق ولا تحت.. فيفضل يعاقر لوقت طويل عشان يرجع مكانه تاني على الأرض وطول وقت المعافرة دي بيفقد حاجات كثير، واحدة ورا التانية بشويش عشان مش يحس. بيفقد حبه للبراح والناس، شغفه وهفته على الدنيا ، الضي اللي في عيونه بينطفى ، إرادته ويقينه وإحساسه بـ معاني كثير بيقفلوا كثير لحد ما بيتلاشوا.. بيتغير لدرجة بترعبه لما يبص بالصدفة على نفسه في مراية روجه .. ولأنه مش هيقدر يصدق ولا يتحمّل الحقيقة دي بيوهم نفسه إن ده حلم أو دور في مسلسل.. يعني كل ده مش حقيقي وهينتهي .. لازم ينتهي .. وهو هيساعد في إنهائه، بأنه يقف، ويفرح أوي في اللحظة دي لأنه قدر ياخذ قرار وعنده الشجاعة إنه ينفّذه.. بس الحقيقة إن انعزاله وعدم قدرته على الاستمرار مش لحظة وقتية هيغيرها بعد شوية لما يكتشف إن قراره كان غلط.. لأ هي بتكون نتيجة تراكم مشاعر وصراعات داخلية أخذت منه كثير أوي .. عشان كده لما يقف ويقول أنا مش ناوي أكمل في التمثيلية دي، مش لأنه

عايز يغير دوره الحالي فيها وياخد دور تاني.. لأ هو حاسس بزهد في الأدوار كلها..
وأيّ كلام أو محاولة لـ ترويض روحه عشان تتحرك تاني بتنتهي بالفشل. أصل ازاي
الروح هتقدر تشتتهي حاجة وجواها حاجات كثير أهم ماتت؟!
- ممكن ماتكونش ماتت.. ممكن تكون فضلت كثير تعلن عن احتياجاتها وانت عاجزة
- أو مش عايزة تسمعيها - ف هربت منها .. وهي افكرتك طنشتيها.. ف كانت
عقوبتك إحساس الشبع/التبلد/الزهد.. وده أسوأ. الزهد في الحياة من فرط الجوع
ليها هو الأسوأ.. لأن الأحاسيس/الاحتياجات اللي كبتتها جواك مابتكونش حقيقي
ماتت.. بتعمل زي السوسة، بتفضل تحفر جواك وانت مش واخدة بالك.. أو مخدرة
نفسك.. خايفة تحسي بيها عشان ما تتصدميش من شدة الألم.. لحد ما بتتهاري تماما.

(٢٧)

وجع الحنين

نتلاقى ← تتعلّق أرواحنا ← نفترق، أفقدهم / أفقدني رغما عني.

واحد تلو الآخر يرحلون.. تفقدهم على مهل بعد أن تورّطت وغرقت كلك في تفاصيلهم.. ينسابون منك بعد أن سكنوا دواخلك حدّ التّوحد فيك.. وكلّ فقد ينتزع معه جزءاً منك، من قلبك، من روحك.. ويهديك (وجع الحنين) لیسكنك بقوة ويُنهكك حدّ الموت !

- إنتِ ليه مش مهمّة تعرفيني أكثر؟!

- تقصد إيه؟

- يعني بتكتفي باللي بقولهولك بس، و مش بتسألني عن أيّ تفاصيل في حياتي أو أيّ حاجة بحكيها لك.

- اعمم مش عارفة السبب بالظبط.. يمكن لأني في فترة كان عندي فهم للمعرفة والتفاصيل لحد ما اتمليت أوي وبقت قدرتي على إدراك وتحمل الأحداث والتفاصيل

تكاد تكون معدومة.. فـ مابقاش عندي فضول إني أعرف أدق التفاصيل.. مابقتش
 ملحة إني أعرف أي حاجة مجهولة/غامضة.. مابقتش زي زمان أسأل وأتقصى عشان
 أعرف الحاجات المستخبية.. فلو مثلا حد جه يحكي لي حكاية/مشكلة يبقى نفسي أقوله
 "أبوس إيدك انجز وقول الملخص" ، أو يمكن لأني مابقتش حابة علاقتي بالناس تتعمق..
 بكتفي بيها سطحية عشان لما تنتهي أعرف أخطاها بـ سهولة.

- تتخطيها وبسهولة كمان! ده إيه الجبروت ده!

- زمان كنت فاكراها قوّة زيك دلوقتٍ .. بس مع الوقت اكتشفت إنك تكون
 شخص بيعرف يتخطى الناس بـ سهولة.. ده مش معناه إنك قوي زي ما إنت فاكـر
 .. ممكن يكون معناه إنك حذر لدرجة إنك مش بتخليهم يتمكنوا من جواك.. مش
 بتسمح لـ جذورهم تتعمق في تربة قلبك وروحك.. فـ بقى سهل عليك تمشي
 وماتبصش وراك لو حد فكر يدوسلك على طرف، بقى عندك استعداد تسبب قبل ما
 تتساب.. وممكن لأنك مش بتسيب نفسك لا ليهم ولا ليك.. بس للخوف! ، بتخاف
 تقرب/تتعمق لـ تتعود/تتعلق/تربط روحك بيهم.. ويجي البعد يكسرك .. فـبتحط
 حواجز/مسافات/قوانين - مش مسموح ليك أو ليهم بـ كسرها - فـ مثلا تقرب
 بس مش أوي ، تحب بس من بعيد ، تخلي مشاعرك دائما تبقى على الحياد بحيث لو
 قربوا أو بعدوا النتيجة واحدة، ما تتوجعش.. والحيادية في القرب/التعلق/المشاعر
 بيخليك لامبالي بالتفاصيل اللي بتكون السبب في إنك تتعمق/تتورط /تهتم
 /تشتاق/تحن/تتوجع.. مش هيحصل كل ده .. أصل مادام ماقربتش أوي يبقى سهل
 إنك تبعد، ولأنك ماتعلقتش أوي يبقى مش هتطلع تجري ورا حاجة مش ليك، ولأنهم
 في حياتك أشخاص عابرين يبقى مش هترتعش كل لحظة وإنت خايف تخسرهم.. بس

(٢٨)

منطقة الأمان

ربما لا شيء أفضل من شعورك بـ الأمان في حضرة أحدهم لـ تحريضك على إطالة
الحديث من اللاشيء / على الصمت وترك عينيه تحاولان تعريتك من رداء القوّة
المُرهِق/على البكاء في كَنَف أمانه/ على الحظو بـ تربيته من دفء كَفِّيه / على أن تغفو
ومُتَّكؤك كِتْفُه/على الاقتراب أكثر وأكثر وإن كان القرب كاشفا لكلّ كسورك
وأضلعك الهَشَّة.

- ممكن أقول حاجة؟

- اتفضل

- يعني أتكلم وتتقبلي كلامي!؟

- بص، إنت حاسس حاجة ممكن تقولها بس من غير شروط.. يعني " أتقبلها أو لأ "

ترجعلي أنا، لأن إحساسك ملكك.. ممكن تعبّر عنه براحتك وفي أيّ وقت وبأيّ

أسلوب.. بس رد الفعل ملكي أنا.. لكن إنت ممكن تتحكّم فيه شوية لو زودت الرقي

في كلماتك.

- طب أنا عايز أسرق روحك.

- وليه تسرفها؟! -
- عشان إنتِ دائما حاطة حوالها شروط/قوانين/قواعد.
- وإنتِ دائما بتلتزم بالـ شروط/قواعد/قوانين؟! -
- أو مال هما بيتخطوا ليه؟! مش عشان نلتزم بيهم.
- لأ مش دائما.. أوقات بيتخطوا عشان يتكسروا.. اللي بيخطوها بيكونوا محتاجين النتائج اللي هتحصل بعد ما يقع فعل الكسر.. بس بينكروا احتياجهم ده.. وليه بيخطوها؟ مجرد وهم فاكرين إنه بيحميهم.. هما معتقدين إن جواهرهم ضعيف وهش أوي لدرجة إن أي خبطة ممكن تكسره حتمت صغيرة ماينفعش تتجمع تاني.. فـ
- بيخطوا القواعد والشروط دي عشان هما يلتزموا بيها قبل غيرهم.. بس المشكلة إن الشروط والقواعد والخواجز دي بتتجمع حوالين "الروح" وتعمل سجن يخنقها..
- والروح بتكون عاملة زي "السجين" اللي نفسه أوي يجرب الحياة خارج حدود سجنه.. بس "نفس" الإنسان دائما بتحاول تفنعه إن السجن مهما كانت خنقته مش هيكون بالسوء اللي برا.. والروح مش بتقتنع أبدا.. بس مش بتحاول تتناقش و تبذل مجهود مع الإنسان اللي حابسها.. لأنها شايفاه مريض وعلته أوهامه، مُقَيّد والقيود خوفه ويأسه واستسلامه، سجين ومجلود والسجان والجلاد هو.. فـ بتستنى وترقب أيّ كسر/إخلال بيحصل في الـ شروط/قواعد/قوانين... وطبعا ده مش بيكون بالسهولة اللي إنتِ مُتخيلها.. أصل أيّ خلل... نفس الإنسان مش هتقبله، هتقاومه وفي الوقت اللي هي بتحاول تصلح فيه الخلل ده.. الروح بتتنفس شوية حرية بيخلوها عندها إرادة وتصميم في إنها تقيس المسافة بينها وبين روح الشخص اللي عمل إخلال في الـ شروط/قواعد/قوانين.. لو لقت المسافة كبرة أوي يبقى مفيش داعي تخلص شوية الحرية/الطاقة اللي اتنفستهم في القرب اللي مش هيوصلهم لبعض... أما لو لقتها مسافة معقولة فـ بتوجه كل طاقتها على إنها تتخطى المسافة دي ومش مهم لو وقعت

هناك.. لأنها خلاص وصلت لـ منطقة الأمان.. وتقدر تشحن طاقة كافية إنها تضمد
بيها كل الجروح، وترمم بيها كل الكسور، وتدور على أيّ مفاتيح ضائعة فـ تقدر
تفتح كل الأقفال والشبابيك وتنور كل ركن مظلم جواها.

(٢٩)

قمر الحرمان

دائما ما كان يُخبرها أنه يتمنى لو كانت أمامه لـ يحتضنها بقوة ولا يفلتها أبدا..
وأمنيته لم تكن تُسعدُها بل كانت تُخيفها ولأنّها لم تكن تعلم السبب كانت تكتفي
بالصمت والانكماش/بتهميش كلماته وتجاهل مشاعره /بالتصل من الإجابة على
محاولته المضنية للنفاذ إلى قلبها لـ يلومها قائلا: لِمَ عليك أن تكوني مكثفية بـ ذاتك

وأنا هنا!؟!

الاكتفاء.. اخترقت تلك الكلمة دواخلها وتردّد صداها في كل ركن لـ يوقظها
ويُعيّرُها أمام نفسها لتجد أنّها حقا مُكثفية بنفسها.. فـ منذ زمن طويل، أجبرت
نفسها على أن تتعلّم تمارين الاكتفاء الذاتي حتى أتقنتها ولكنّ تلك التمارين لم تُجد
نفعاً مع الوجد والثقل الذي يضغط دواخلها ويجعل تنفّسها محدود، ولم يمنع مطلقا
الإحساس المميت بالوحشة والوحدة، ولم يحدّ من رغبتها المتزايدة في أن يحتضنها
شخص مُحب بقوة يُشعرها بالأمان ويساعدها على البكاء، و لم يمنع تفكيرها المتزايد
في الموت والرحيل عن الحياة!

– أنا مش قادرة أتقبل اهتمامك ومش حاسة مشاعرك وبأزعل من نفسي أوي لما
بلاقيك بتتعب وتحاول توصلني وأنا لسه بعيدة أوي!

– إنت واقفة بيني وبينك!

– جربت قبل كده تمسك نفسك عن الحلم؟

– الحلم .. ليه؟!!

– لأن قلة الحيلة مش بتخليك تملك غير الأحلام .. بس لأنك مُدرك إنك بالفعل مش
هتقدر تعيش جوا الحلم طوال حياتك، وإن الأحلام مش هينفع تتحول لـ حقيقة
وإنت في مكانك، فبتحاول تعوّد نفسك إنها كمان تبطل أحلام.. بتجبرها تقفل
شبابيك خيالك وتحبس نفسك ومشاعرك وأحلامك وكلك جوا شرنقة وتخليهم
يتعودوا على الضلمة.. بس المشكلة لما تلاقي حد بيعمل حاجة اتمنيت كثير تعملها..
وقتها بتلاقي مشاعرك/أحلامك/نفسهم أوي يطيروا برا الشرنقة.. غصب عنك/عنهم
بيجي عليك لحظات كثير يبقى نفسك أوي تكون مكانه عشان تقدر تمارس حاجة
بتحبها.. أو حتى تتخيل إنك هو أو معاه.. مش مهم إنت مين وقتها.. المهم تقدر تحيا
اللحظات دي إنت كمان .. بس لأنك مسكت نفسك عن الحلم مش بتقدر تنفصل
عنك وتتوحد معاه.. أحلامك بتخاف من الهوا اللي داخل وبتكتم تنفسها.. و
مشاعرك بتبقى عاملة زي اليرقة اللي جوا الشرنقة خايفة من لحظة الخروج لأن
جناحاتها لسه صغيرة وممكن ماتقدرش ترفرف بيهم وتقع.. ومهما إنت أو غيرك
حاولتوا تقنعوا الحلم إنه يسبب نفسه ويتنفس الهوا مش بيقنع/مش بيتنفس .. ومهما
قولتوا للمشاعر إن الحلم هيخليها تكبر وتقوى وتبقى فراشة جميلة ترفرف بسعادة
برضو مش بتقنع/مش بتخرج.

..

أنا محتاجة أسيب نفسي وأحبك أوي بس خايفة أسيبها بس تحلم.. طمّني وأنا مش
هقف بيني وبينك .. ساعدني أسيب نفسي وأحبك حتى لو وقعت واتكسرت
واتوجعت.. المهم الخوف يبطل يرعب أحلامي/مشاعري ويموتهم.

(٣٠)

فوبيا الاهتمام

(*)

ذات يوم قال لها : أنتِ وردة جميلة ، ف ابتسمت من رقة تشبيهه ، ثم أكمل: الخوف
أن تذبلي قبل أن تعيشي، ف أطرقت حزنا وشردت، ف معنى كلماته أن الوردة
سينتهي أمرها إن لم تكسر قوقعتها التي تضمها وتحجب عنها كل ما يجعلها تفتتح ..
ستموت عطشا والماء حولها والشمس فوق رأسها إن لم تفتح منافذها المسدودة
وتكشف ما تمفو إليه روحها وتصبو إليه نفسها.

– عارف الكلام الحلو والاهتمام عموما أوقات كثير بيخوف ويوجع.

– ازاي؟! لما مش بيكون من حقنا؟

– ده سبب.

– والسبب الثاني؟

– لما بيوصف ويلمس جوانا أوي.

– وده يوجعنا أو يخوفنا ليه؟! المفروض نفرح إن فيه حد قدر يحسنا أو يقرأ جوانا.

– ما هو ده السبب.. إنه قدر مع كل الأقنعة اللي مخبيين نفسنا وراها يشوف وشنا

الحقيقي .. قدر باهتمام بسيط منه يهد الجدار اللي قعدنا سنين طويلة نبنيه عشان

مفيش حد يقدر يوصلنا.. ده بيخوف.. مع إننا بنكون محتاجين ده أوي.. محتاجين حد يقدر يقرأنا صح.. محتاجين إيده تتمدلنا ولمسته تدفيننا.. محتاجين كلامه الحلو واهتمامه كـ طبطبة على أوجاعنا والصراع بين احتياجنا ليه وبين خوفنا منه بيوجع.

– طب ما نتقبل الاهتمام ده من غير ما نخاف؟ ليه نخلي خوفنا يمنعنا عنه؟! – يمكن خايفين نتعود على اهتمامه، خايفين نسند عليه وفجأة نلاقي نفسنا وقعنا على الأرض، ويمكن بنخاف لأننا من صغرنا اتعودنا على المنع.. دا إما كان بيتحطنا حدود مش نتخطاها وقواعد تحرم أيّ مشاعر حسية.. فـ طلعتنا مش متعودين على الحب والاهتمام فـ بقى صعب نتقبله ونادر لما نعبّر عنه.. بقى فيه مشكلة عندنا في التعبير ببساطة عن اللي بنحس بيه في وسط بيئة بتتحفظ على كثير من أفعالنا وبتخجل من مشاعرنا وطبيعتنا.. فـ بقى ممكن تعبر بالكتابة عن مشاعرك بس صعب تبوح بيها قدام حد.. سهل تكتب لـ حد " بحبك، وحشتني، ابتسامتك حلوة، إنت جميل، شكرا، أنا محتاجك... "، بس صعب أوي تعبر عن نفس المشاعر دي قدامه – عينك في عينه – وقدام الناس.. لأنك لو عملت كده إما هتكون شخص مش طبيعي وهتلاقيهم يبصولك باستغراب وكأنك جاي من كوكب تاني.. أو هيبصولك بقرف وهما بيتهامسوا عليك لأنك عبرت عن مشاعرك وبقيت في نظرهم شخص بجح وقليل الأدب.. وعشان متبقاش شخص شاذ عنهم بقيت تدفن مشاعرك جواك أو تزخر فيها شوية.. يعني بدال " وحشتني وبحبك ومحتاجك " تقول " والله وليك وحشة، فين الغيبة دي كلها، اشتقنالك، مفتقدينك، إنت غالي على قلوبنا وكلنا بنحبك... " كلنا أو صيغة الجمع دي هما المجتمع والأسرة.. هما اللي قمعوا جواك حرية التعبير عن مشاعرك الحميمية وشوّهوا مفهوم الونس الإنساني وخلوا كل حاجة عيب وحرام.. فـ تلاقيك دائما بتحشرهم في وسط كلامك وكأنك بتقولهم " كله قدام عينكوا أهو مش بعمل حاجة غلط والله " ... في حين إنك ممكن تعبر عن كرهك لأي شخص وتقوله في العلن

وعينك في عينه " بكرهك ، ربنا ياخذك ، إن شاء الله تموت " تظهر عداوتك ليه
ببساطة قدام الكل وتبقى عادي شخص طبيعي ! .. لأنك متعود تسمع وتشوف ده
كثير.

(**)

- أشدّ ما أحتاجك في لحظات اليأس والألم.. ولكنك دائما تكون آخر من يصلني !
- ما الذي يمكنني فعله وأنا لا أستطيع الإمساك بك؟! أنت دائما الهروب.. وبحثي
عنك يكون بلا فائدة.

- بهذا الإصرار الضعيف، أزلت تدّعي محبتي؟!

- نعم ولكنني أحبك بلا أمل.. ألا ترين أنك صعبة المراس؟!

- أنت محق.. ولكنك أيضا خائف من أن يُثقل كاهلك الاستحواذ عليّ تماما وامتلاك
زمامي أكثر مني.. فـ لا تلمني، أنت متواطئ معي في مؤامرة الهروب، وعبثا إن قلت
لك تمسك بي ولا تدعني أهرب.

- المفروض عشان تمسك حد مش هتدورّ عليه في المكان اللي سبته فيه.. لأ هتدورّ
عليه في المكان اللي هيكون فيه .. زي ما بيحصل في لعبة الاستغماية.. أول ما إنت
تغمض هو هينتقل من المكان اللي عينك شافته فيه وعرفت بوجوده لمكان تاني احتمال
تتعب أوي عقبال ما توصله.. مع إنه ممكن يكون قريب منك أوي بس إنت معرفتش
تقرأ جواه كويس.. فدورّت عليه في مكان غلط وكانت النتيجة إنك مش عرفت
تلاقيه.. وبعدين لومته بأنه مش ساعدك وصعب عليك اللعبة أوي.

العالم وتعميداته.. يعني إنت جيت تحميه وجعته.. ولما وجعته خاف منك وبدأ ياخذ رد فعل.

- يعني هيتمرد عليا؟

- أه بس تمرد سلبي .. هيعمل نفس اللي كنت بتعمله مع العالم الخارجي عشان تحميه .. هيخبي نفسه منك.. ولو حاولت تقرب منه وتفهمه إن " إنت هو .. وهو إنت " هيلعب معاك استغماية.. هيخليك تغمض عينيك ويهرب منك جوا قوقعته.. هيستخبي منك لأنه خايف عليك أكثر مما هو خايف منك.. خايف إنك لما تشيل الأقنعة وتشوف هشاشته تترعب وتقرّب، عشان كده أول لما تخلص عدّ وتفتح عينيك وتبدأ تدور عليه هيكون هو عامل حسابه وماسح آثار خطواته عشان متعرفش توصله عن طريقها.. ولو فيه أي خيوط ممدودة بينك وبينه يبشدها لحد ما تتقطع.. ولو إنت نجحت وربطت الخيوط اللي بينك وبينه تاني.. هيعقد هالك عشان كل ما تقرب منه خطوة تلاقي عقدة تحاول تفكها متعرفش فتزهق وتمشي .. وبعد شوية وقت ترجعله تاني وتحاول معاه مرة تانية.. الأول بـ تلومه إنه صعب عليك اللعبة أوي .. وبعدين تطلب منه فرصته تانية بس مش بيرد عليك غير بنظرة متعرفش إذا كانت سخرية ولا شفقة.

(***)

أشعر أنّ روحي قُسمت إلى شوارع ضيّقة مظلمة جدا.. ومهما حاولت لا أستطيع أن أتخطاها.. فـ أنا لا أرى النور.. الظلمة تملؤني، تُطوّقني وتمنع عني الشمس.. فهلاً وضعّني بـ مواجهتي!.. لـ أصرخ وأجري بعيدا عني/إلي.. لـ أمسك يدي الباردة

بقوة.. وأحتضن روحي الخائفة ولا أفلتها أبدا.. سأخبرها أن غدا ستشرق الشمس،
ف هي تشتاق جدا إليها.. إلى الدفء.. إلى الحياة.

عارف زي ما إنت بتضايق لما حد مش يتقبل طبيعتك الغريبة دائما والعدوانية أحيانا..
وزي ما إنت مابتحبش غيرك يفقد أمله منك ويسيبك ويمشي .. بردو " جواك "
ببزعل منك لما تفقد الأمل منه.. ف متقولش إن هو مات ومش هينفع يطرح تاني ..
متقولش إنك عملت كل اللي عليك وتبطل تسقيه.. لأن ممكن فجأة تلاقي طريق
اتفتح قدامك وجواك بقى يطرح ورود حلوين أوي.

- طب ما الفرصة الثانية ممكن تكون هي اللي هتساعدني أخلي " جوايا " يطرح ورود
حلوين .. يبقى ليه " جوايا " مش بيمسك فيها .. ليه مش بيساعدني أساعده ؟

- لأن اللي عايز حاجة بيعملها مهما كانت صعبة.. مش هيطلب ويتكلم كثير، لأ
هيشغل في صمت .. وعشان كده سؤال نفسك لـ جواك.. وسؤال غيرك لـك بـ
فرصة تانية مالوش معنى.. يعني مثلا اللي عايز يكون قريب منك مش هيطلب منك
فرصة أولى أو تانية أو لأ هيخلق فرصته بنفسه ولو قضى عمره كله يفك العقد
دي ويوصلك في قوقعتك.. بـ عقلانيته وحكمته هيخترق كل الجدران اللي بنيتها من
ضعفك ومخاوفك ، وبجنانة هيلمس جواك براحة لحد ما يقدر يوصل لمراكز التحكم
جواك ف يطبطب عليهم ويطمئنهم لحد ما يسيبوك ليه، بيستسلموا ليه وهما فرحانين
لأنهم هياخدوا راحة وهما مطمئنين إن فيه حد هياخد باله منك.. و هيشيل كل الأقنعة
من غير ما يجرحك.. هيجرّر دموعك وكل الكلام اللي محبوس جواك.. هيشيل التراب
عن كل الحاجات اللي مقدرتش تستوعبها فدفنتها حية جواك.. ولما تظهر له هشاشتك
وجروحك قدامه كـ حقيقة بجد مش هيخاف ويتربع منك مش هيستخبي ولا

هينخيك عن عيونہ.. لآ هيشوفك ويحسك وانت في أسوأ حالاتك.. هيحس برغبة قوية في إنه يخبك عن كل الدنيا وايديك من كل اللي جواه.. هتحس بيه في أقرب نقطة ليك وحتى لو مكانش قريب منك، روحه محاوطاك أوي.. ضربات قلبك الضعيفة هتقوى بوجوده.. هتثق فيه لدرجة إنك هتتنفس النفس اللي طالع منه.. كل المشاعر والأفكار السلبية جواك بالتدريج بتتبدل.. لأنه كان حريص أوي إنه كل كلمة/ كل تصرف بيقوم بيه تجاهك يكون دوا لوجعك ولكل الشروخ اللي جواك.. ومش بيسيبك أبدا إلا لما يطمئن إنك قويت.. مش بيرضى يرجعك للعالم الخارجي إلا لما يحس إنك قادر تواجهه كل حاجة تقابلك فيه من غير أقتعة.. وقتها بس بتقدر تمسك في الفرصة اللي هو خلقها.. لأنك أول مرة تحس إن جزء منك موجود جوا حد تاني.. ف قدر إنه يشوف ويحس ويشاركك في كل إحساس.. أول مرة تحس إن حد قدر يحتوس كيانك الهش من غير ما يوجعك.. أول مرة تحس إن فيه حد مليون بيك وبكل تفاصيلك وتعقيداتك لدرجة التخمة ومش مضايق بالعكس فرحان ومنون ليك إنك سمحتله إنك تكون جواه.. بـ توصل للحظة اليقين إنه قد الحاجات الكاملة الحقيقية.. إنه هيحاول بكل طاقته يعلمك تواجه بهويتك الحقيقية.. لأنه لما وقفك قدام المראה وخلاك تصرخ لما شوفت كل المشاشة والجروح جواك.. عرف يهدّي صرختك بأنه خلاك كمان تشوف كل الحاجات الحلوة والنادرة جواك.. ف مبقاش للهوية المستعارة أي لازمة.. لأنه بقى فيه جواك شعور بالثقة والأمان والشجاعة والدفاء.. ف بالتالي أيّ وجع وأيّ إحباطات هتقابلك هترجعك في الآخر ليه /ليك/ لـ هويتك الحقيقية.. وهتزود يقينك بيهم.... ف أكيد لو عملت كده مع " جواك " مش هينخاف ويستخبي منك مش هيضطر يلعب معاك استغماية.. لأنه هيكونلك كتاب مفتاح.. كل تفصيلة وكل حرف فيه هتبقى واضحة جدا ليك.. وهو مش هيكره ولا

يُجمل من ده أبدا - حتى لو كانت جلدته مشوّهة و حروفه منعكشة وفيه صفحات
متقطعة - لأنه عارف إنك دايمًا مهما كانت حالته هتتقبله وتستوعبه وتحبه.

(٣١)

محتاجك

أنت تحمل جرحا.. وبداخلي أشعر بـ أئينه حدّ بكاء روعي! .. فـ دعني أخفّف عنّا،
لتكن ضمتي لـ جرحك بمثابة "منديل" يكفكف دموع روعي.

" تعبانة لتعبك وإنّ بعيد.. ولأني معنديش الشجاعة أقرب وأخفّف عنك.. ولأن كل
لما الحاجز اللي بينا يتهد يرجع تاني أقوى وأعلى.. ولأني لسه زعلانة منك وعليك..
ولأن الدنيا كبرتني أوي فمبقتش أنسى.. ولوثتني أوي فمبقتش أسامح.. ووجعتني
أوي فاكنتيت وبعدت.. ولأنك كنت موجود ومش موجود فمقدرتش تحميني.. ولأني
لسه محتاجك أوي وإنّ لسه ناسيني..!"

- لـ مين الكلام ده؟
- مش لحد أو كان لحد ودلوقت بقي كلام وبس.
- وليه كان مؤلم أوي كده؟
- عشان الحد ده وقتها كنت محتاجاه أوي.. وفي نفس الوقت كنت حاسة إنه
تعبان أوي.. بس ولا هو افتكرو وجودي وقرب.. ولا أنا قدرت أسامحه على
نسيانه ليا..!
- وإيه اللي حصل خلاه كلام وبس؟
- افتكرت حاجات وحصلت حاجات غيرتني.
- زي؟

- ٣ بنوتات عرفتهم على مراحل ..

البنوته الأولى : كانت صاحبتى وأنا في إعدادي .. كانت بتحب تمسك إيدي أوي وإحنا قاعدين وإحنا ماشيين في أيّ حته وفي أيّ وقت .. وأنا كنت بضايق جدا من الحركة دي .. كنت بحسها مقيداني شوية .. بس على قد ما أقدر حاولت إيني مش أبينها إيني مضايقة .. لأنها أكيد مش قاصدة تضايقني .. بس هي كانت محتاجة تطمن ودي طريقته في إنها تحسس نفسها بالأمان وتحسني بأنها بتحبني.

..

البنوته الثانية : عرفتها في ثانوي .. أنا في المرحلة دي كنت شقية ومشاعبة .. و مرة مدرس زعق، فبعد الحصّة قعدت أعيط وأمسخ في دموعي .. كل صحابي اتلموا حواليا وقالولي معلش .. وواحدة من الفصل مش صاحبتى أوي جت اخترقت اللّمة وحضنتني من غير ولا كلمة .. وطوّلت أوي في الحضن .. وأنا مكنتش فاهمة حضنتني ليه .. ماتعودتش إيني لما أبقى زعلانة حد يحضني .. كنت بس بسمع كلام " معلش ، مترعليش ، كفاية عياط بقى ، " وبردو اتخنقت و كنت عايزاها تنجز بقى في الحضن اللي طول ده .. بس بردو مش قولتلها .. لأني حستها مستمتعة أوي .. وكانت عارفة هي بتعمل إيه .. ومدى تأثيره عليها وعليها .. لأن مش بس اللي بيتحضن هو اللي بيرتاح .. لا كمان اللي بيحضن .. لأنه إيه هيخليه يحضنك لو مش حس بأنين وجعك جواه ودي طريقته بأنه يريحك ويرتاح معاك.

البنوته الثالثة : عرفتها في الجامعة .. كنا جروب من أربع بنات .. واحدة منهم كانت صاحبتى أوي ومتعودة عليها عشان كنا بنروح مع بعض .. والاتنين التانين بردو صحاب أوي لأنهم كانوا ساكنين مع بعض في المدينة الجامعية .. لما اتخصصنا بقى .. راحت أنتيمتي في تخصص مختلف عني .. وفضلت معايا واحدة من الاتنين اللي في

المدينة.. يعني بقينا اتنين .. البنوته دي كانت ليها طباغ مختلفة عن صاحبتى/انيمتى اللي اتعودت عليها.. ومش عرفت أتأقلم معاها خالص .. وكنت بشيل منها دايمًا.. لحد ما في يوم انفجرت فيها وحاولت تصالحي ومش رضيت أبدا.. فجت أنتيمتى وقالتلى " هتسيبها لوحدها في آخر سنة " الجملة دي أثرت معايا أوي .. وافتكرت إن البنوته دي مش بتقعد أو بتمشي إلا معايا.. يعتبر ملهاش صحاب غيرنا وأنا بس اللي معاها في التخصص ده .. فـ بقيت أركز على مميزاتها وعلى طريقتها في التعبير عن نفسها.. لقيت إنها طيوبة أوي وفي حالها مش بتحاول تحشر نفسها أو تتدخل في خصوصيات غيرها ده غير حرصها إنها تتمسك بالصدقة اللي بينا وحاجات تانية كانت بتعملها عشان تعبرلي عن حبه ليا بس أنا مكنتش باخد بالي أو بتجاهلها.

....

الـ ٣ بنوتات دول غيروني .. عرفوني إن كل واحد ليه طريقته الخاصة في التعبير عن نفسه - طباغه ، احتياجاته ، مميزاته ، مشاعره ، ... - واللي أكيد هتكون مختلفة عن طريقيتني .. واللي احتمال إني معرفهاش .. ولا تعجبني .. بس ممكن أتعلمها .. ولو معرفتش .. ليه أحرمه منها .. ليه أحاول أغيره بـ نفوري منه أو انتقاده أو إني أتجاهلها؟! مادام هو مستمتع بطريقته دي وباستمتاعه مش بيضرنى يبقى خلاص أسويه يمارسها براحته ومع الوقت ومع تكرار الموقف فهمت إن فيه ناس حواليا ليهم مشاعر/احتياجات زي بالظبط وطرقهم في التعبير عنها مش لازم تكون زي وحقهم عليا إني أتفهم ده وأقبلها من غير ما أحاول أغيرها .. فـ سأحتم الحد اللي كتبته الكلام ده .. سأحتمه لما عرفت إن طريقة تعبيره عن حبه واهتمامه بيا /مشاعره ناحيتي/احتياجه ليا مختلفة عن الطرق اللي أعرفها.. وده أكيد مش ذنبه.. المهم إننا نحاول نتعرف ونتقبل طرق بعض عشان المسافات تقل والخلاقات تدوب والاحتياجات تتلبي.

(٣٢)

الثقة الغير مشروطة

لا أحتاج أن تعدني بأشياء ربّما لن تستطيع جعلها حقيقة دائمة.. لا توهمني بأنك باق مهما طال الزمان، وأنك لن تخذلي أبدا إلى الحد الذي يجعلني أكرهك ، وبأئني لن أشتاقك وأحن إليك .. فـ يا عزيزي لا شيء يدوم أو يبقى على حاله، كل الحياة وما فيها إلى زوال .. فقط أحتاجك أن تحاول بجد وحينها سنتقبل معا النتائج مهما كانت.

— أوعدك إني هكون دائما جنبك، هتكوبي جوا قلبي وأقرب إليّ من روحي.

— ماتوعدنيش.

— ليه؟! إنتِ مش واثقة فيا؟

— عايزة أثق فيك ثقة غير مشروطة.

— مش فاهم.

— بص، فيه أسماء معينة بحسها ليها طعم وريحة ... مثلا " أحمد ، رهف ، رؤى ، سلام

، نور ، ورد ، حنين ، مراد ، ضي ، خلود ، آسر ، يوسف ، ضياء" لما بنطقهم بحس

بـ طعم حلو وريحة نقاء .. وبحب أشوفهم مكتوبين أوي .. وغالبا بتعود على

أصحابهم بسرعة جدا .. بحسهم واخذين طعم وريحة أسمائهم .. وسبحان الله معاهم

خاصية الحدس بتبقى متعطلة، وده بيكون مريح جدا .. لأني دائما بعتمد عليها أولا في

قبول / القرب - شخص أو حاجة - أو لأ، ف من وقت ما حسيت بالراحة.. بقيت
 مش بسيني لـ أحاسيسي أوي .. مع إني بثق في أيّ إحساس بحسه جدا.. بس بقيت
 بخاف إني أكون بساعده في تضليلي من كتر حبي إنه يكون قد ثقني.. يعني مثلا لما
 يكون كل حاجة في الشخص اللي قدامك صح أوي بس جواك إحساس غير كده..
 ده بيخليك تصبر/تعمق أكثر لحد ما الإحساس اللي جواك يترجم لـ حقيقة / واقع
 أو لأ.. بس ممكن لأنك حابب إحساسك يطلع صح تختلق إنت الحقايق دي عشان
 ماتحسش إن إحساسك خذلك .. لأن إحساسك ده جزء منك مش حابب تحس إن هو
 كمان اتخلي عنك وخذلك وأعمى بصيرتك.. مش حابب تحس إنه مينفعش تتسند
 عليه.. عايزه دائما يطلع صح.. وده ماينفعش.. لأنه زيه زي أيّ حاجة في الدنيا ممكن
 يطلع صح وممكن لأ .. وليه مميزاته وعيوبه .. وده مش معناه إنك ماينفعش تثق فيه و
 تتسند عليه تاني لو خذلك مرة.. لأن كده تثقتك فيه هتكون مشروطة بتوقعات وده
 مرهق أوي ليك وليه.. فـ الأحسن إنك تثق فيه من غير توقعات.. تحسسه إنه أد
 المسؤولية اللي رميتها عليه وأهل لـ تقديرك بس متبنيش توقعات أو تحط نتائج سواء
 نجاح أو فشل .. خلي ثقتك فيه غير مشروطة عشان ماتخسرهوش.

.....

فـ خيلنا نحب بعض من غير وعود ممكن أوي مانقدرش ننفذها
 خيلنا نثق في حينا من غير شروط تعجزه وتقصر في عمره
 خيلنا ما نرهقش بعض بـ توقعات ونتائج نخذلنا وتوجعنا
 خيلنا بس نحاول نكون مع بعض/جوا بعض على قد ما نقدر

(٣٣)

عايزة أعيش

أن تُحب : أن ترغب في أن تكون جميلاً.. أن تتوق للحياة أو بالأحرى تتذكر أنك تستحق الحياة وأن لك قلباً خفتت نبضاته كثيراً من تراكم الأوجاع عليها، وروحا أظلمت من كثرة الأيام التي صاحبت فيها الحزن، وأنفاساً تضيق كلما ذبلت مشاعرك وإنطفأ ضيِّ الأحلام.

- بتفكري في إيه؟

- في الحب

- أخيراً... ومين المأسوف على شبابه؟

- حبيبي.

- يعني عشان ينول الشرف ويبقى حبيبك يموت؟!

- الحب بيعحي مش ييموت.

- مين الكداب المخادع اللي فهمك كده؟

- حبيبي.

- وصدقته ليه؟

- عشان حبيت نفسي.

- وهو؟!

- عرفت أحبه لما حبيتها.

- الله الله، والله وقعت وماحدث سمي عليك.

- عارف أحيانا التعلق/حب شخص ما بيخليك تتخلي عن نظرتك اللامبالية

للمشاعر/للناس/ للحياة .. لما في الوقت اللي مش متوقع ولا منتظر أي حاجة/في

الوقت اللي معتقد إنك مش محتاج ولا هتحتاج أي حد/في الوقت اللي مستسلم أوي

لـ أحزانك/أوجاعك/اكتئابك.. بتلاقي قلبك بيفرح بـ نظرة حنونة منه، كلمة

جواها معاني حلوة، صمت فيه كلام كثير ماحدث سامعه ولا فاهمه إلا أنت،

بتكتشف إنك ماكتتش بتعرف تفرح/تحلم/تعيش .. كنت دائما عايش في غم وهم ..

بس لما ضحكت لقيت إن ضحككتك حلوة أوي ، ولما بقى عندك حلم بقيت تعافر

عشان تحققة ، ولما اهتمت بنفسك وحييتها بقيت تعرف تهتم وتحب غيرك، فـ بقيت

عايز تضحك ، عايز يكون عندك أحلام تحققتها/عايز تعيش لحظات حلوة/عايز تعيش

وتحب وتتحب /عايز تتغير للأحسن عشان نفسك وعشان اللي بيحبك وبتحبه.

- بس أوقات زي ما الحب بيعلق الإنسان بالحياة برضو بيكون السبب في إنه يكرهها.

- ازاي؟

- في فيلم (عيد الحب) أشرف عبد الباقي قال : " ربنا خلق الناس في الدنيا دي

بيدوروا على الحب فيه منهم اللي بيلاقيه وفيه منهم اللي بيدوروا عليه طول حياتهم "

فيه ناس لقوا الحب لما لقوا المعاني/المشاعر /الاحتياجات اللي كانوا بيدوروا عليها ،

وفيه ناس لقوا الحب لما حسوا بمشاعر عميقة مجهولة الأسباب، وفيه ناس لقوا الحب في

معنى العطاء المطلق /إنهم يدوا من غير مقابل/يحبوا عشان روحهم محتاجة الحب/عشان

جواهم مايضلمش، وفيه ناس لسه مش لقوه/لسه متلخبطين/ لسه بيسألوا : مادام

الحب معاني ومشاعر واحتياجات أو مال ليه أوقات بتلاقي كل حاجة إنت عايزها

وبتدور عليها في شخص .. بس قلبك مش يميل؟ ليه فيه ناس بتشغل مكان كبير جوانا

على الرغم من إنهم ما عندهمش القدرة إنهم ينوروا /يدفوا المكان ده؟! ، ومادام الحب هو مشاعر عميقة مجهولة الأسباب .. يعني تصدق قلبك وتمشي وراه لما بتلاقيه بيدق أوي وفرحان في وجود شخص مع إنك مش لقيت عنده أي حاجة كنت عايزها وبتدور عليها.. و لما تحس إنك مش هتقدر تعيش من غيره ، أو مال الناس اللي بيحبوا بعض بيسيوا بعض ازاي؟! قلوبهم اللي كانت بتدق أوي لما بيلمحوا بعض وقفت ازاي؟! شغفهم بـ تفاصيل بعض خلص ازاي؟! كملوا وارتبطوا وحبوا تاني ازاي؟! ، ومادام الحب هو عطاء مطلق .. أو مال ليه (جيهان عمر) قالت " رغم المقولة الشائعة بأنه في الحب يجب أن نعطي فقط .. إلا أنني غالباً ما أمنح روحي وأجلس على عتبة قلبه .. في انتظار المقابل "

ف ازاي الإنسان يقدر يعرف إن ده الإنسان اللي لازم يكمل معاه حياته؟ ازاي يتأكد إن قراره بالارتباط بيه مش هيكون ظلم ليه /ظلم لنفسه /ظلم لـ أطفال كل ذنبهم إنه أخذ قرار ونفذه؟ ازاي يتأكد إن طريقه معاه آخره هيكون البيت/النور/الراحة/السكن/المودة والرحمة!؟

– متهيألي الحب بيموت والناس بيسيوا بعض لما بيلاقوا الحياة الزوجية الواقعية مش نفس الاسطمة اللي صنعتها ليهم الأفلام/الروايات أو لما بيطلوا يسمعوا لـ احتياجات بعض

– لو تفتكر زمان وإحنا صغيرين اتعلمنا في درس علوم ، نجيب علبة زبادي فاضية ونفرد في القاع حنة قطن ونبلها بشوية ميه ونرش فوقها أي نوع من الحبوب .. حلبة أو فول أو قمح، أي حاجة في البيت وبعد كام يوم بنلاقيها بتنت .. نديها ميه فـ تكبر .. مش عملنا خوارق يعني عشان البذور تنبت .. بس ميه واهتمام .. عرفنا إيه اللي هي محتاجه عشان تكبر وإدينا هو لها، الموضوع ده بيقلوا عليه " ذكاء الشعور " ،

إنك تعرف بالظبط إيه اللي أنا محتاجه منك ومش تبخل بيه عليا حتى لو إنت كنت من اللي ينطلق عليهم " فاقد الشيء " ، أه إحنا دايمًا بنقول فاقد الشيء لا يُعطيه.. بس مش مستحيل إننا نتغلب على الموضوع ده سوا .. لأن أكثر حاجة ممكن تطمّن مخاوفنا وتشفي جروحنا إن يحصل عكس المقولة دي :

" إننا نحب بعض بـ ضعفنا وحيورتنا وضباعنا وكل عيوبنا وتعقيداتنا ونواقصنا .. إنك تسندني حتى وإنت مش قادر تقف .. وأريحك حتى وأنا تعبانة أوي ، إنك تلاقيني وتمسك أيدي حتى وإنت ضايع جدا.. وأطمنك حتى وأنا خايفة جدا، إن يكون البطارية جواك قربت تخلص.. مش فيها إلا حبة طاقة صغيرين جدا .. يدوبك مكفينك بس مش هتبخل عليا بيهم .. وإني أخاف عليك وأهتم بيك لدرجة إني مش أحتاج أقولك "خلي بالك من نفسك" ، إنك تتعلم معايا "فن الاعتذار " فـ تقربلي خطوات لو بعدت عنك خطوة.. وأتعلم معاك العفو فـ أرجعلك جري لو مشيت وأنا بتلكع ، إنك تكون عيني اللي بشوف بيها الدنيا حتى وإنت أعمى ، وأكون صوتك اللي مش قادر تطلعه حتى وأنا خرسه ، إن كل واحد فينا يبني ليه بيت جوا التاني.

الخاتمة

عزيزي القريب - البعيد -

كم الكتابة إليك مُغرية وموجعة ! أعترف أنني كنت أتبرأ من قلمي في كل مرة أنتهي من كلماتي إليك .. لأنه كان يقسو عليك فأتألم عوضاً عنك .. ولكن لولا يقيني بأنك ستقرأ - عقل واعٍ و قلب مُتفهم، ما كنتُ كتبتُ بهذا الصدق.

صدقا كُلي متعبة بك وبدونك

ف فراري منك يوصلني إليك

وبعدي عنك يقربني منك

وجفائي عليك ليس إلا شوقاً إليك

أحتاجك بشدة..

وربما لهذا توأطأت معك في محاولة احتلالك لـ كُلي .. ف دون أن أشعر وجدت حروفي وكلماتي تتراصّ بجانب بعضها البعض في تناسق كبير لتبني جسراً من المشاعر أودّ بشدة أن يصلني بك ويصلك بي .. ولا يهم في أيّ نقطة سنلتقي .. في البداية، ربّما في منتصفه، وربّما في النهاية، لا يهم .. المهم أن نلتقي .. فلتحتلمي قليلاً .. ما زلت لم أروي لك بعد أحلى حكاياتي .. فكن صبوراً، قد نلتقي يوماً ..



عصير الكتب للنشر الإلكتروني

2014 - 2013

تعريف بالكاتبة

- مروة متولي زهران.
- من مواليد القاهرة ٢٩ أغسطس ١٩٨٧.
- حاصلة على بكالوريوس كلية العلوم بجامعة القاهرة بتقدير عام امتياز مع مرتبة الشرف.
- نُشر لها كتاب خواطر (لحظات تأمل) مع دار ليلي كيان كورب.

للتواصل

الصفحة الشخصية على الفيس بوك:

<https://www.facebook.com/marwa.zahran.56>

صفحة كتاب لحظات تأمل :

https://www.facebook.com/LhzatTaml?ref_ttype=bookmark

المدوّنة :

[/http://moment-hopes.blogspot.com](http://moment-hopes.blogspot.com)